

Wäo ingante Itota Codito Nänö Odömongainö

Wäo wiiimonte bai nänö
adi, ante yewæmongainö

1 ¹Wëenënedë quinä wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quinä bai baquii, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pönongä ponte odömongä atabopa. ²Botö Wäömo guiquënë, Quinä botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobaï wiiimonte bai tömänö botö adinö ante, Nö impa, ante yewæmömopa.

³Wængongui beyæ botö apænedö ante ii yewæmöintaa yewæmömopa. Mänintaa adinque në apænedäni nänö toquinque. Ayæ mäninta botö yewæmöninö ante ëñente cædäni nänö toquinque. Edæ iimaï baquionæ wantæ iñö oo baquinä anguënë.

**Godongämæ nani pönencabo
tiæte ganca inäni beyæ Wäo
yewæmongampa**

⁴Botö Wäömo inömo imopa. Atiabæ iñömö wayömö wayömö incæ Codito ingante godongämæ mini pönencabo onompo æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenënedë në quëwengainä inte nïwo quëwengä incæ ayæ wantæpiyæ quëwencæcäimpa. Tömengä Önöwoca incæ onompo æmæmpoque go mëwoga önöwocaidi bai ëwocadongä inte Wængongui nänö aacæ tæ contayömö tæcætawë inö në ongongampa. Ininque Mæmpocä tönö tömengä Önöwoca waadete pönö cæda ate minitö gänë entawencæminimpa.

⁵Ayæ adobaï Itota Codito edæ Wængongui ingantedö ante cöwë ædæmö pönï apænedongä inte wængä ate tåno nänö ömæmongaingä ingampa. Tömengä tömämæ awënë odayeidi nänö Tæiyæ Awënë Odeye inongä ingampa. Tömengä adobaï mönö imonte në waadete pönëningä inte mönö wënæ wënæ cægäinö adinque tömengä wepæ inte mënongacäimpa. Tömengä adobaï waadete pönö cæcä ate minitö gänë entawencæminimpa, ämopa.

⁶Ayæ Itota, Botö Awënë Odeyebö nempo quëwëninge minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui qui, ante në godömö bagaimö imopa. Tömengä nää bai ëmöñongante mönö waocabo tömenganque ingante waa acäimpa. Tömenganque cöwë në tæi piñænongä inte quingämenque quëwënäni iñönänite tömengä tömänäni Awënë inongä ingampa, ante mönö cöwë angäimpa, ante Amëë, ante ämopa.

⁷Ëñëedäni, tömengä edæ boguimancodë wææñongante,

tömänäni tömengä ingante
acädänimpa.

Tömengä ingä nē timpogainäni
incæ adobai tömengä ingante
acädänimpa.

Ayæ tömämaë quëwënanäni tömänäni
tömengä ingante adinque Ca ca
wæcädänimpa.

Mänömai baquinö angüenë, ante
botö, Amëë, ämopa.

⁸Wængongui Awënë adocanque
Tömää nē Cægainingä inte iïmai angampa.
“Botö Tänäbo ingaimo inte Tömämo
inguïmo ïmopa.” Mänömainö ante nē
angä iñömö tömengä wënenëdë do
quëwengainingä inte ñöwo quëwengä incæ
ayæ wantæpiyæ quëwencæcäimpa.

**Itota Codito nē ñäö bai ëmongainingä
ingante Wäö nänö adö**

⁹Botö Wäömo inömo ïmopa. Minitö
töniñabo inte botö minitö tönö Awënë
Odeye Itota nempo quëwëninque mönö
tömengä tönö godongämä aamö inömö
ïmopa. Botö minitö tönö godongämä
wæwëmö ïmö incæte mönö wæntæye
inämai inte ee cæmompä. Wængongui
nänö angainö ante apænedinque ayæ,
Itota mönö Codito inongä ingampa, ante,
Nö impa, ante botö apænedö beyænque
botö wää tëiwänë Patömoto iñömö tee
mönete bai quëwentabopa.

¹⁰Wængongui Awënë itädë iñonte
Wængongui Tæiyæ Waëmö Önöwoca
incæ botö ïmote bæi ongonte bai
cæyongä botö önöñabæ inö adocanque
tedepämo todompeta nani ancadeca we
önte bai yedæ tē ëñentabopa. ¹¹Iïmai
angantapa. “Bitö quinö wiïmonte bai
abii, ante yewæmöintaa yewæmöe.
Yewæmöninque wayömo wayömo
incæ Codito ingante godongämä nani
pönencabo önompo æmæmpoque go
mencabodäniya iñönänite tömënanäni
inänite da godöe,” ante angantapa.
“Epeto quëwëñömö quëwënanäni
Ætämüdöna quëwëñömö quëwënanäni
Pedegämo quëwëñömö quëwënanäni
Tiatida quëwëñömö quëwënanäni Tadoditi
quëwëñömö quëwënanäni Pidadedepia

quëwëñömö quëwënanäni ayæ Daoditea
quëwëñömö quëwënanäni Codito ingante
godongämä nani pönencabo nani cabo
nani cabo iñönänite bitö tömënanäni
inänite iï bitö yewæmöninta da godömi
æncädänimpa.”

¹²Äñongante botö, Æcänö äna
ëñëmoo, ante dadi ëmænte atabopa.
Dadi ëmæñömote yædo concædi ti
wodönoincade oodo inte badöincade
önompo æmæmpoque go mäa ganca
ongoncade atabopa. ¹³Ayæ yædo
concædi ti wodönoincade ongöñömö
adoyömo tæcæguedë adocanque nē
Waocä ëñagainingä bai inte ongongä
atabopa. Tömengä doyæncoo önöwa
ganca incoo mongæninque ayæ
tæcæenëmä inö pacadeyænta oodo
inte badöi ëenëmængä ingantapa.
¹⁴Tömengä ocabo tönö ocagui iñömö
dayö näämænta pöni ëmö bai adobai
encadinque yoguimö ñäö pöni ëmö bai
adobai ñäö bai encacä ingantapa. Ayæ
tömengä awinca incæ gonga wo bæcote
bai ëmongä ingantapa. ¹⁵Tömengä
önöwa incæ yaëmenta bodonte nani
änö gongapamö guii ocoi äñonte
ñäö ëmö bai tömengä adobai ëwacä
ingantapa. Tömengä tedeyongä æpæ
mä conta goyonte æpæ tē bai adobai
tē ëñentabopa. ¹⁶Tömengä önönempe
tömempo incæ nëmöidi æmæmpoque go
mäa ganca næængantapa. Ayæ tömengä
önöne inö yaëmë tipængaa waingamë
engamë ënedinque yædæ tadete
ongongantapa. Ayæ tömengä awinca
incæ nænque nanguï tamonte bai ñäö
bai ëmongantapa.

¹⁷Tömengä ingä adinque botö
tömengä önöwa inö wænte bai tæ
gowææntabopa. Tæ gowææñömö
tömengä önompo tömempo inte botö
ïmote gampodinque “Bitö guïñänämai
incæbiimpa,” ante äninque edæ, “Tömää
badönämai iñedë botö Do Quëwengaimo
ïmopa. Ayæ tömäa iinque bayedë
incæ botö Ayæ Pöni nē Quëwëmo
incæboimpa,” ante angantapa. ¹⁸Edæ
“Botö nē Quëwengaimo inömo inte nē
wænïmo incæ ñäni ömæmonte cöwë

wantæpiyæ quëwëmo inömo imopa. Waodäni në wænte godinäni nani wænte ongöñömö ongöñönänite botö, Cöwë wænämaï quëwencæminimpa, ante botö tæi piñæmamo inte në æmo imopa.

¹⁹“Mänömaï beyæ bitö wiïmonte bai bitö adinö ante quinö ñöwo i, ante quinö iïncayæ ate baquï, ante yewæmoe ämopa. ²⁰Mänii nëmöidi önompo æmæmpoque go mä ganca botö önönempe tömempo incæ mä öñoncoo bitö adincoo ante, Æbänö i, ante bitö ëñenämaï inönö ante botö edonque pöni apænebo ëñencæbiimpa. Botö imote godongämæ nani pönencabo önompo æmæmpoque go mencabodäniya iñönänite tömënäni inänite në aadäni bai nëmöidi inänipa. Ayæ yædo concædi ti wodönoincade oodo inte badöincade önompo æmæmpoque go mä ganca ongoncadedoo bitö adincoo ante, Quinö bai inänii, ante botö adobai bitö imite edonque pöni apænebo ate në ëñemi bacæbiimpa. Wayömö wayömö incæ botö imote godongämæ nani pönencabo önompo æmæmpoque go mencabodäniya iñömö tömënäni yædo concædi ti wodönoincade bai adobai inänipa,” ante Waocä në ëñagaingä iñömö botö imote apænecäiimpa.

Godongämæ nani pönencabo tiæte ganca inäni inänite Itota nänö änö

*Epeto iñömö quëwëñäni
inänite Itota nänö änö*

2 ¹Ayæ adocä godömenque apænecantapa.

“Epeto iñömö Wængongui ingante godongämæ nani pönencabo inänite në aacä acæcäiimpa, ante botö änö ante iïmaï yewæmoe ämopa. ‘Botö edæ nëmöidi önompo æmæmpoque go mä ganca botö önönempe tömempo në näæmo imo inte botö adobai yædo concædi ti wodönoincade oodo inte badöincade önompo æmæmpoque go mencadea incade ongöñömö adoyömö tæcæguedë në cægömo imopa.

²“ ‘Minitö æbänö cæminii, ante do ëñemopa. Edæ nanguï pöni cædinque

minitö wæntæye inämaï inte ee cæminipa. Minitö wiwa cædäni inänite Baa ante quëwëminipa, ante do ëñemopa. Ayæ Wængongui nänö në da godongaimöni imönipa, ante në änäni incæte inämaï iñönänite minitö, Nawangä inänii, ante ëñencæte ante apænte adinque, Tömënäni babæ änänipa, ante ëñente wæminitapa. ³Minitö wæntæye inämaï inte ee cæmini iminipa. Ayæ botö ëmowo apænete beyænque wæwëmini incæte godömenque godömenque cædinque minitö mimönë nangæ badämaï iminipa, ante do ëñemopa.

⁴“ ‘Incæte adoque pöni mini cædinö wiï waa abopa. Minitö edæ wiï wëñëñedë bai ædæmö waadete pönëmini iminipa, ante awædö.

⁵Edæ minitö waa cædimini imini incæte ñöwo wæætë wënæ wënæ cæmini bamini awædö. Mäninö ante pönëedäni. Mänii mini wënæ wënæ cædinö ante, Anca wæwente awædö, ante pönente ñimpo cædinque minitö wëñëñedë mini waa cægai bai adobai cæte quëwëedäni ämopa. Ämo ëñëñinque minitö mini wënæ wënæ cædinö ante wædämaï imini adinque botö minitö weca pömaïmopa. Pöñinque mini yædo concædi ti wodönoincade nänö ongöñömö ongöñonte botö ö ænguimodö angüenë. ⁶Incæte adoque mini cædinö guiquenë waa abopa. Minitö edæ Nincodaitaidi nani änäni nani cædö ante adinque piïnte iminipa. Botö adobai tömënäni nani cædö ante adinque piïnte imopa.

⁷“ ‘Wayömö wayömö incæ botö imote godongämæ nani pönencabo inänite Wængongui Öñowoca quinö angää, ante tömengä nänö änö ante në ëamonca imini inte ëñëedäni. Wængongui waa gönea iñömö mäniñömö adowænque quëwenguiwæ pædiwæ iwæmpa. Tæi ëmonte në gänä cædäni inänite botö iñömö, Mäniwæ inca cæncæminimpa, ante pædæ godoncæboimpa,’ ante mäñinque

ämopa,” ante Waocä nê ëñagaingä
iñömö botö imote apänegacäimpa.

**Ætämidoña iñömö quëwëñäni
inänite Itota nänö äno**

⁸Ayë adocä godömenque
apäñecantapa.

“Ætämidoña iñömö Wængongui
ingante godongämë nani pönencabo
inänite nê aacä acäcäimpa, ante botö
änö ante iimaï yewämöe ämopa.

“Tömää badönämaï iñedë botö Do
Quëwengaïmo ïmopa. Ayë tömäa
iïnque bayedë incæ botö Ayë Pöni
nê Quëwëmo incæboïmpa. Botö nê
wänimo incæ ñowo wæætë ñäni
ömæmongaïmo ïmopa.

⁹“ Minitö wæwëmini inte adobai
ömæpomini iminipa, ante botö do
ëñëmopa. Incæte minitö nö ëamini
iminipa. Oodeoidi pancadäniya,
Mönitö Wængongui ingante möni
pönencabo imönipa, ante nê änäni
incæte wii mänömaï inänipa.
Tömëñäni minitö iminite ancaa
piïnte babæ änewëñäni inänipa, ante
botö do ëñëmopa. Mäninäni iñömö
Tatäna ingante nani ëñencabo inte
mänömaï cädänipa töö. ¹⁰Minitö
quïnö beyë wæwencæ cæmini imini
incæte guiñëñämaï iedäni. Tatäna
incæ, Æbänö cæminii, ante acæte ante
cæcä beyænque waodäni pancaminiya
iminite tee mönecädänimpa.
Önompö tipæmpoga eönæ iñonte
wæwenguïmini iminipa. Ininque
minitö mini wænguinque wæmini
incæ cöwë pönëninque ædæmö
cæedäni. Mänömaï nê cæmini ininque
botö, Mini cöwë quëwenguïnta, ante
poganta bai minitö iminite pönömo
æmaïminipa.

¹¹“ Wayömö wayömö incæ botö
imote godongämë nani pönencabo
inänite Wængongui Önöwoca quïnö
angäa, ante tömengä nänö äno ante
nê ëamonca imini inte ëñëedäni.
Wadäni adopoque wæninque nani
mempoga wænguïmämo bai tæi
ëmonte nê gänä cädäni iñömö wæætë

mempoga wänämaï incädänimpa,
ante mäninque ämopa,” ante Waocä
nê ëñagaingä iñömö botö imote
apäñecäïmpa.

**Pedegämo iñömö quëwëñäni
inänite Itota nänö äno**

¹²Ayë adocä godömenque
apäñecantapa.

“Pedegämo iñömö Wængongui ingante
godongämë nani pönencabo inänite
nê aacä acäcäïmpa, ante botö äno
ante iimaï yewämöe ämopa. ‘Botö
edæ yaëmë tipængaa waingamë
engamë näæmo ïmopa.

¹³“ ‘Ædönö quëwëminii, ante botö do
ëñëmopa. Tatäna containpa ongonte
nänö aayömö adoyömö minitö
quëwëmini imini incæte botö imo edæ
ñimpo cädämaï quëwëmini iminipa.
Mini quëwëñömö Tatäna adoyömö
quëwengä ininque, Antipato edæ botö
änö ante cöwë pönëninque ædæmö
apäñedongä iñongante mäniñömö
quëwëñäni tömengä ingante
wänönäni wængantapa. Tömengä
wæñedë incæ minitö botö imote edæ,
Dicæ pönëmogaa, änämaï iminipa.

¹⁴“ ‘Incæte pancaa mini cædinö
wii waa abopa. Edæ pancaminiya
docä Badäo nänö odömonte
apäñegainö ante ëñëwëmini awädö.
Tömengä iñömö, Badaco godö cæcä
beyænque idægoidi tee tëwate bai
oda cæcädänimpa, ante cædinque
adocä Badaco ingante odömonte
apäñecä ëñente cægacäïmpa.
Wadäni, Mönitö wængongui cængui
impa, ante nani cönöni ante, Minitö
cæedäni, ante Badaco iñömö idægoidi
inänite odömonte apäñegacäïmpa.
Ayë onquiyëñäni tönö godö
towente cæedäni, ante odömonte
apäñegacäïmpa. ¹⁵Ayë pancaminiya
adobai Nincodaitaidi nani odömonte
apäñedö ante ëñëwëmini awädö.
¹⁶Mänömaï beyë mini wënæ wënæ
cædinö ante, Ancaa wæwente awädö,
ante pönente ñimpo cæedäni. Minitö
mini wënæ wënæ cædinö ante

wädämaï imïni adinque botö wantæ
iñonte mïnitö weca põmaïmopa.
Pöñinque tõmënäni nãni odömonte
apænedö ante nê ëñewënäni iñönãnite
botö önöne incæ yaëmë ënedinque
yædæ tadedinque guëädö guëa
cæcæboïmpa.

¹⁷“Wayömö wayömö incæ botö
imote godongämæ nãni põnencabo
inãnite Wængonguï Öñöwoca quïnö
angää, ante tõmengä nãnö äñö ante
nê ëamonca imïni inte ëñeedäni.
Tæï emonte nê gånä cædãni inãnite
cænguï mänää nãni angainö botö wê
wodöni cænguï iñonte godömo ænte
cæncædänïmpa. Adodãni inãnite
adobaï dica näämæntaca godömo
æncædänïmpa. Wa ëmowo ante
pemöñinque mänincaa yewæmonte
ingæïmpa. Nê ænãnique mäniwo
ëñënäni inãnipa,” ante mäñinque
ämopa,” ante Waocä nê ëñagaingä
iñömö botö imote apænecäïmpa.

**Tiatida iñömö quëwënäni
inãnite Itota nãnö äñö**

¹⁸Ayæ adocä godömenque
apænecantapa.

“Tiatida iñömö Wængonguï ingante
godongämæ nãni põnencabo inãnite
nê aacä acæcäïmpa, ante botö äñö
ante iïmaï yewæmoe ämopa. ‘Botö
edæ Wængonguï Wëmo inömo imopa.
Botö awinca incæ gonga wo bæcote
baï nê ëmömo imopa. Botö önöwa
incæ yaëmenta bodonte nãni äñö baï
ñäö baï nê ëwabo imopa.

¹⁹“Mïnitö æbänö cæmïni, ante mïni
waadete põnenö ante mïni wede
pönenö ante wadäni inãnite mïni waa
cædö ante botö do ëñëmopa. Mïnitö
wæntæye inãmaï inte ee cædinque
godongämæ cæmïni imïnipa, ante
ayæ, Wëenëñedë do waa cædimïni
inte ñöwo godömenque waa cæmïni
imïnipa, ante adobaï do ëñëmopa.

²⁰Incæte adoque põni mïni cædinö
wïi waa abopa. Onquiyængä Etabete
nê ëmongä iñömö edæ, Wængonguï
beyæ nê apænëbo, ante nãmä incæ

nê angä ingante wido cædämaï
imïni inte wæætë tõmengä ingante
ayæ godömenque Ao äminipa
töö. Iñæmpa tõmengä iñömö botö
imote nê cædäni inãnite nãnö
odömonte apænedö beyænque oda
cæte gocædänïmpa, ante cæcä beyæ
tõmënäni onquiyænãni tönö godö
towente cædänipa. Wadäni, Mönitö
wængonguï cænguï impa, ante nãni
cönöni cænänipa töö. Mänömaï
cæcædänïmpa, ante mäningä
onquiyængä odömonte apænecäïmpa.

²¹“Tõmengä nãnö towente
cædimämo ante, Botö wënæ wënæ
cæbo inte ancaa wæwente awædö,
ante põnente wabänö ñimpo
cæquingää, ante botö tõmengä ingante
ee pänämaï intabopa. Incæte tõmengä
nãnö wënæ wënæ cædö ante wädämaï
quëwengä ingampa. ²²Iñinque botö,
Tõmengä ingante cæbo beyænque
wënæ wënæ bate wæwencæcäïmpa,
ante cæcæboïmpa. Ayæ tõmengä
nãnö odömonte apænedinö baï nê
ëñente cædäni iñömö tõmengä tönö
nãni guëa godö möwëninö ante,
Mönitö wënæ wënæ cæmöni inte
ancaa wæwente awædö, ante põnente
ñimpo cædämaï inãni iñinque
tõmënäni inãnite adobaï botö cæbo
beyænque nanguï wënæ wënæ bate
wæwëmainänipa. ²³Tõmengä wënäni
inãnite wænömo wæncædänïmpa.
Iñinque wayömö wayömö incæ botö
imote godongämæ nãni põnencabo
tömancabodäniya iñömö, Botö incæ
tõmënäni nãni mïmöno tönö ocaidë,
Æbänö põnenänii, ante nê ëñëmo
inömo imopa, ante ëñencædänïmpa.
Ayæ mïnitö cædi baï ante adinque
botö wæætë adobaï mïnitö tõmämïni
imïnite cæcæboïmpa.

²⁴“Wamïni pancamïniya guiquënë
Tiatida iñömö quëwëmini inte
mäningä onquiyængä nãnö odömonte
apænedö ante mïnitö nê põnenämaï
imïnipa. Ayæ Tatäna wê wodonte
nãnö angainö ante ëñënämaï
imïnitapa. Iñinque botö mïnitö

īminite iūmaī āmopa. Mīnitō teēmē mongæncōo mongænte gote bai wædāmaī incæmīnīmpa, ante wadō ante ānāmaī incæboīmpa. ²⁵Wæætē botō ocæ ēmænte wæænganca mīnitō edæ do mīni pōnēnō ante nīmpo cædāmaī iedāni. Mānīnque āmopa. ²⁶“Inguipoga iūnque baganca ædānidō botō ānō nē cædōnāni inte tæi ēmonte nē gānā cædāni inānite botō pōnō cæbo ate tōmēnāni nāmā tæi pīñænāni badīnque tōmāmæ quēwēnāni inānite nē ānāni bacædānīmpa. ²⁷Botō Mæmpo botō imote pōnō cæcā beyænque Awēnē badīnque nāmā tæi pīñænte inte nē āmo bai botō adobaī tōmēnāni inānite pōnō cæbo beyænque awēnēidi badīnque aacædānīmpa. Tæiyæ awēnē tōmengā nempo quēwēnāni inānite aacā bai tōmengā iñōmō tōmāmæ quēwēnāni inānite, iūmaī cæedāni, ante aacæcāīmpa. Dai inte bæte cængæmō tæi ænacā nancate bai cædīnque tōmengā adobaī wabæca wabæca quēwēnāni inānite nangui pante cæcæcāīmpa. ²⁸Mānīnāni inānite botō adobaī wadaamō nāō bayonte apāimō incæ godōmo æncædānīmpa. ²⁹“Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca īmīni inte ēñēedāni,’ ante mānīnque āmopa,” ante Waocā nē ēnagaingā iñōmō botō imote apænegacāīmpa.

Tadoditiidi inānite Itota nānō ānō

3 ¹Ayæ adocā godōmenque apænecantapa. “Tadoditi iñōmō Wængongui ingante godongāmæ nāni pōnencabo inānite nē aacā acæcāīmpa, ante botō ānō ante iūmaī yewæmōe āmopa. ‘Wængongui Ōnōwoca incæ ōnompō æmæmpoque go mēwoga ōnōwocaidi ēwocadongā ingampa. Botō iñōmō tōmengā ingante nē ēwocate

quēwengaimo inte nēmōidi ōnompō æmæmpoque go mēa ganca ināni nē næænte ingaimo imopa.

“¹Inīnque, Mīnitō æbānō cæmīnīi, ante do ēñēmopa. Mīnitō mīimīni quēwēmīnīpa, ante wadāni apænedāni incæte mīnitō wīi waa cæte quēwēmīni inte do wængaināni bai imīnīpa tōō. ²Edæ, Botō Wængongui ayongā mīni cædīnō wīi eyepæ cæmīnīpa, ante adīnque botō, Nāni ōmæmōedāni, ante āmopa. Nāni ōmæmōinīnque mīnitō, Ayæ mīīnāni quēwēnāni incæ nē wæncæ cædāni bai badāni incæte tōmēnāni wænāmaī inte wæætē tæimō bacædānīmpa, ante cæedāni. ³Mānōmaī beyæ, Quiēmē do ænīmīni bai īmīnīi, quiēmē ante do ēñēmīnīi, ante mānīnō ante wæætē adodō ante pōnēedāni. Pōnēnīnque mīnitō mānīnō ante ēñente cæedāni. Ayæ mīni wēnæ wēnæ cædīnō ante, Ancaā wæwente awædō, ante pōnente nīmpo cæedāni. Wæætē mīnitō wīi nāni ōmæmonte bai īmīni ate wædīnque botō incæ mīnitō weca awēmō nē ængā bai pōmaimopa. Ayæ, Awēmō nē ængā æyedēnō ponguingāā, ante ēñēnāmaī ināni bai botō adobaī mīnitō ēñēnāmaī iñōmīni mīnitō weca awēmō ponguīmo apa quēwēmīnīi. ⁴“Incæte Tadoditi iñōmō mīni quēwencabo iñōmīnite pancadāniya tōmēnāni weocoo wentamō nāmōnāmaī bai īnīnāni inte nē waa cæte quēwēnānīpa. Mānīnāni waa cæte quēwēnāni beyæ eyepæ inōnāni inte weocoo nāāmæntacoo mongænte botō mīñæ gocædānīmpa. ⁵Nē tæi ēmonte gānā cædāni iñōmō adobaī weocoo nāāmæntacoo mongæncædānīmpa. Ayæ, Quēwenguinta, ante Wængongui nānō yewæmongaintaa mānīnāni ēmōwo do yewæmōi īnīnque botō cōwē wadæ cædāmaī incæboīmpa. Wæætē botō Mæmpo Wængongui weca ayæ tōmengā anquedoidi weca botō, Iīnāni botō mīñæ gogaināni inānīpa, ancæboīmpa.

6“ Wayömö wayömö incæ botö
 imote godongämæ nāni pönencabo
 inānite Wængongui Önöwoca quinä
 angää, ante tömengä nänö änö ante
 nē ēamonca imini inte ēñēedāni,
 ante mäninque ämopa,” ante Waocä
 nē ēñagaingä iñömö botö imote
 apänegacäimpa.

Pidadedepiaidi inānite Itota nänö änö

7 Ayæ adocä godömenque
 apäñecantapa.

“Pidadedepia iñömö Wængongui
 ingante godongämæ nāni pönencabo
 inānite nē aacä acæcäimpa, ante botö
 änö ante iimaï yewämöe ämopa.
 ‘Botö edæ nē Tæiyæ Waemö ingaimo
 imopa. Nö ante cægaïmo inte botö
 docä Awënë Dabii nänö wi änequi
 nē näængaïmo imopa. Ininque quinä
 odemö botö wi änebo incæ mäninemö
 wacä ædö cæte tee möneqingää.
 Ayæ quinä odemö botö tee mönebo
 incæ mäninemö wacä ædö cæte wi
 äneqingää.

8“ Minitö æbänö cæminii, ante do
 ēñēmopa. Minitö cæcæminimpa,
 ante botö odemö wi ænete bai cæbo
 aedāni. Æcänö mäninemö wæætē
 tee möneqingää. Edæ dæ angampa.
 Minitö wiï tæï piñämīni imini incæte
 botö angainö ante ēñente cæminii inte
 botö emöwo ante, Dicæ ēñēmönīyaa,
 ante änāmaï inīmīni iminipa. Botö
 do ēñēmopa. 9 Mōni oodeocabo imōni
 incæ pancadāniya, Mōnitö Wængongui
 ingante möni ēñencabo imōnipa,
 änāni incæte ināmaï inānipa. Wæætē
 tömēnāni iñömö babæ änewēnāni
 inānipa. Tatāna ingante nāni
 ēñencabo inānipa töö. Botö godö cæbo
 ate adodāni mīnitö weca ponte mīnitö
 önöwa gäänē ædæ wææncædānimpa.
 Ayæ, Botö mīnitö iminīte nē waadete
 pönengaïmo imopa, ante botö godö
 odömömo ēñencædānimpa. 10 Minitö
 iminīte, Ee cædinque wæntæye
 ināmaï iedāni, ante botö angainö ante
 ēñente nē cædimini imini adinque
 botö wæætē mīnitö iminīte wææ

aacæboimpa. Inguipoga quēwēnāni
 tömānāni nāni wæwenguimāmo ancaa
 baquinö angüenē. Edæ Tatāna, Æbänö
 quēwēnāni, ante acæte ante cæcä ate
 nāni wæwēnedē botö iñömö, Minitö
 wæwēnāmaï incæminimpa, ante
 mīnitö iminīte wææ aacæboimpa.
 11“ Botö oo ocæ emænte ponguimo
 imopa. Wængongui poganta
 nänö godonguinta, ante mīnitö
 iminīte godongä æncæminimpa.
 Māninta mīni ænguinta iñömö
 wacä ænāmaï incæcäimpa, ante
 mīnitö mīni entawēnō ante
 godömenque godömenque ñimpo
 cædāmaï iedāni. 12 Botö cæbo
 ate waodāni tæï emonte nē gānā
 cædāni iñömö tömēmo Wængongui
 tæiyæ waemö oncönē wantæpiyæ
 quēwenguinānidö angüenē.
 Tömēnāni Wængongui weca cöwē
 quēwente taodāmaï incædānimpa.
 Tömēnāniya botö Wængongui emöwo
 yewæmoncæboimpa. Mīi Eedotadēē
 nāni äñömö iñömö botö Wængongui
 nänö quēwēñömö iñonte māni
 tömengä nänö quēwēñömö incæ
 öönædē inö da pönongä wæængæimpa.
 Māni Wængongui nänö quēwēñömö
 emöwo botö adobai tömēnāniya
 yewæmoncæboimpa. Ayæ botö wawo
 botö ñöwo pemongaiwo adobai
 tömēnāniya yewæmoncæboimpa.
 13“ Wayömö wayömö incæ botö
 imote godongämæ nāni pönencabo
 inānite Wængongui Önöwoca quinä
 angää, ante tömengä nänö änö ante
 nē ēamonca imini inte ēñēedāni,
 ante mäninque ämopa,” ante Waocä
 nē ēñagaingä iñömö botö imote
 apänegacäimpa.

Daoditeaidi inānite Itota nänö änö

14 Ayæ adocä godömenque
 apäñecantapa.

“Daoditea iñömö Wængongui ingante
 godongämæ nāni pönencabo inānite
 nē aacä acæcäimpa, ante botö änö
 ante iimaï yewämöe ämopa. ‘Botö
 emöwo Amēē, ante pemongaïmo

inte botō cōwē, Nāwangā impa, ante nē cōwē aedēmō apānegaimo imopa. Wēēnēñedē Wængongui nānō badongāñedē māniñedē botō tōmengā tōnō godongāmā badongaimo beyenque tōmengā nānō badongaincoo tōmancoo Awēnē badinque botō nē āmo imopa.

¹⁵ “Minitō æbānō cæminii, ante do ēñēmopa. Yoguiipæ bai ināmaī imini incæte ocoi āmæ bai adobaī ināmaī iminipa tōō. Īnāmpa yoguiipæ bai iminipa diyæ waa aquimoo. Edæ ocoi āmæ bai iminipa diyæ waa aquimoo. ¹⁶Minitō yoguiipæ bai ināmaī imini incæte ocoi āmæ bai ināmaī imini inte wæætē wīi eyepæ cæmini inte gānē āmæ bai iminipa tōō. Mānōmaī beyæ botō edæ tōmēmo ōnōnē towæ tānonte bai minitō iminite adobaī wido cæcæ cæbo apa quēwēminii. ¹⁷Minitō, Mōnitō nangui ēamōni imōnipa, ante āminipa. Edæ, Tōmēmōni māincoo gæte da wēninque eyepæ ēamōnipa, ante āminipa. Īnāmpa māninō ante wapiticæ pōnente āminipa. Minitō mini wæwēnō incæ ēñēnāmaī iminipa tōō. Minitō æbānō bate cæminii, ante adinque wadāni, Minitō wodi, ancædānimpā. Ōmæpodāni bai imini inte minitō babetamōnāni bai imini inte ōmaadāni bai imini incæte, Mānōmaī imōnipa, ante ēñēmīniyaa. ¹⁸ “Mānōmaī beyæ botō, Īmaī cæedāni, ante waadete āmopa. Botō pōnō cæbo beyenque minitō wæætē waa bate bai nangui cæcæminimpā, āmopa. Māninō botō pōnō cædō ĩñōmō oodo gongapamō aca podonte ate waēmō oodo bate bai impa. Īninqe minitō, Mōnitō nangui ēamōni bacæmōnimpā, ante cædinque botō weca ponte tōmēmo oodo ante godonte æedāni. Ayæ, Ōmaamōni ināmaī incæmōnimpā, ante guingo imōnāmaī incæmōnimpā, ante minitō botō weocoo nāāmæntacoo godonte ænte mongæedāni. Ayæ minitō, Awinca waa acæimpā, ante cædinque tōmēmo awinca cōnōmōimæ godonte æninque cōnōmōedāni.

¹⁹ “Botō nē waadete pōnēnāni inānite botō pīinte āmo inte adobaī pante cæbo imopa cæminii. Minitō nangui cædinque mini wēnæ wēnæ cædinō ante, Ancaa wæwente awædō, ante pōnente ĩmpo cæedāni. ²⁰Ēamonca ēñēedāni. Botō incæ odemō yabæ ĩnō ongonte bai waomīni mīmōno a ongōninqe, Wi ænequi, ante aa peyōmo waocā æcāmenque incæ ēñēninque odemō wi ænete botō imo, Pō guīie, angā ĩninqe botō ĩñōmō edæ tōmengā mīmōnē pō guicæboimpā. Tōmengā mīmō botō oncō bai ĩnonte botō tōmengā tōnō cænte bai cōwē quēwencæboimpā. Ayæ tōmengā wæætē botō tōnō cænte bai cōwē quēwencæcāimpā. ²¹ Botō tæī ēmonte nē gānā cægaīmo inte botō Mæmpo nānō aacæ tæ containpaa tōmengā tōnō guēa tæ contagaimo bai nē tæī ēmonte nē gānā cædāni ĩñōmō adobaī botō tōmēmo aacæ tæ contayōmo botō tōnō godongāmā tæ contacdānimpā, ante āmo adopaa tæ contaquināni.

²² “Wayōmō wayōmō incæ botō imote godongāmā nāni pōnencabo inānite Wængongui Ōnōwoca quīnō angāā, ante tōmengā nānō ānō ante tōmēnāni nē ēamonca imini inte ēñēedāni, ante māninque āmopa,” ante Waocā nē ēñagaingā ĩñōmō botō imote apānegacāimpā.

Öönädē ĩñōmō Wængongui ingante watapæ apānedāni

4 ¹ Botō Wāōmo ĩnōmo inte ayæ ate æmō ayōmote öönädē ĩnō odemō wi ænete atabopa. Todompeta nāni ancadeca we öonte yedæ tē bai tedepāmo tāno botō ēñēnīnō ĩñōmō ñōwo wæætē adopāmo botō imote ĩmaī āninque, “Īñōmō pō æe. Æñōmite botō, Ayæ ate quīnō baquēnē inguīi, ante bitō ĩmite edonque odōmōmo acæbiimpā,” angantapa.

² Māninō ante āñongā Wængongui Ōnōwoca incæ botō imote bæi ongonte bai cæyongā botō wīimonte bai adinque

iïmaï atabopa. Öönædë inö Awënë tæ contaimpa ayömo adocanque mäninömö tæ contacä atabopa. ³Mäningä adoyömö nê tæ contadongä iïnömö dica ñäö bai ëmonca bai adobai ëmongä ingantapa. Aatape nani äninca bai codönadina nani äninca bai mäninca mencaa ñäö bai inca bai tömengä adobai ëmongä ingantapa. Awënë tæ contaimpa iïnömö daimë dica bai etëmedada nani äninca ëmonca bai inte æidämæ waimë pöni gongämënimpa. ⁴Mänimpa Awënë nänö aacæ tæ contaimpa waimpacoo bænticoatodo ganca mänimpopacoo mäninömö godämæ a ongompapa. Adopacoo iïnömö nê aadani nê Picænäni bænticoatodo ganca mänimpodäni tæ contadinque näämæntacoo mongæninque poganta oodo inte badöinta da wencate a ongönänitapa. ⁵Awënë tæ contaimpa inö näinte yædæ yædæ ta gote detæbo tæi tæi tē tēnonte yedæ pöni änimpa. Ayæ Awënë tæ contayömö tæcætawë inö tī wodönoincade önompo æmæmpoque go mencedea wocædöincadecoo a ongönimpa. Wængonguï Önöwoca incæ önompo æmæmpoque go mēwoga önöwocaidi bai ewocadongä inte mänincadecoo bai ingampa.

⁶Ayæ Awënë tæ contaimpaa tæcætawë inö adobai gäwapæntibæ bai iïnonte awocawænta bai inimpa. Ayæ Awënë tæ contaimpa iïnömö miiinani quëwënanäni mënaa go mënaa inäni godämæ a ongönänitapa. Mäninäni iïnömö tæcætawë inö önöñabæ inö tömäo awinca ëmönäni atabopa. ⁷Tänocä miingä quëwëngä botö adingä iïnömö nēöö bai ëmongampa. Ayæ wacä miingä quëwëngä botö adingä iïnömö wagada mæmpo bai ëmongampa. Wacä miingä quëwëngä botö adingä iïnömö tömengä awinca waocä awinca bai ëmongampa. Ayæ tömangä miingä quëwëngä botö adingä iïnömö guingämöwæ pao pao gocä bai atabopa. ⁸Mëa go mëa miiinani quëwënanäni incæ adocanque adocanque önompo æmæmpoque go adoguënpænque ëmænte quëwënanäni

inänipa. Ayæ adodäni inte tömënanäni baonga godämæ tömanga nangui pöni awinca ëmonce ænömengadænguënepæ incæ awinca adobai ëmönänipa. Mäninäni edæ itædë woyowotæ ñimpo cædämaï inte iïmaï ante ämotamini änanipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængonguï Awënë bitö adobique Tömää nê Cæbi inte wëenënedë do nê quëwëngäimi imi ñowobi adobi inömi inte ayæ wantæpiyæ cöwë quëwëncæbiimpa.”

Ante ämotamini ante cöwë änanipa.

⁹Awënë tæ contaimpaa nê tæ contadongä inte nê wantæpiyæ cöwë quëwëngäingä ingante apænedinque mëa go mëa miiinani quëwënanäni iïnömö iïmaï ante apænedänipa. Bitö ñäö ëmömi imipa, ante apænedinque tömënanäni, Bitö imite waa amönipa. Mönitö bitö imi waa ate pönente apænemönipa, ante apænedänipa.

¹⁰Mänömaï ante apæneyönäni nê aadani nê Picænäni iïnömö bænticoatodo ganca mänimpodäni Awënë tæ contaimpaa nê tæ contadongä inte nê wantæpiyæ cöwë quëwëngäingä weca ædæ wææninque tömengä ingante, Bitö Wængonguï Awënë imidö anguëne, ante watapæ apænedinque tömënanäni poganta gä æncadinque Awënë tæ contaimpa gäänë cö cædinque iïmaï ante ämotamini ante änanipa.

¹¹“Bitö iïnömö mönitö Wængonguï Awënë imidö, ämönipa. Bitö badöinënö, ante pönente ingäimi inte öönædë ongönäni tönö inguipoga ongönäni tönö tömänäni inänite badongaïmi imipa. Bitö wii badömi bai tömänäni badongainäni quëwënamäi dæ ancædönänimpa. Mänömaï beyæ bitö eyepæ inömi iïnömite, Bitö ñäö ëmömidö anguëne, ante mönitö bitö imite waa amönipa.

Bitö nämä tæi piñante nê cæbi
imidö, ante bitö imite ämönipa,”
ante ämotamini ante änänipa.

**Wængongui Codotedo
yewämöinta wi æmpocampa**

5 ¹Ayæ Awënë nänö aacæ tæ
containpaa nê tæ contacä iñömö
tömengä önönempo tömempo incæ
yewämöinta dadi ompointa næængä
atabopa. Mäninta tipäataa yewämöinta
impa. Adotaa yæwedeta iñömö
guifnenca bai inte tee bædinta önompo
æmæmpoque go mentaa inimpa. ²Ayæ
Wængongui anquedo adocanque nê tæi
ëmongaingä inte yedæ aa pecä atabopa.
“Mäninta dadi ompointa wi æmpoquii,
ante æcänö nö waa pönï inongä inte
eyepæ inte tee bædedinta wäa wäa
ænete wi æmpoquingä,” angantapa.
³Ayæ öönædê incæ inguipoga incæ
tadömengadænga incæ cöwä ayönäni,
Æcänö mäninta wi æmpoquingä,
cæcadenta inö æcänö aqingä, ante
edæ dæ angantapa. ⁴Æcänö nö waa
pönï inongä inte eyepæ inte dadi
ompointaa wi æmpoquingä iñömö
edæ dæ angampa. Cæcadenta inö
æcänö aqingä ante dæ angampa, ante
adinque nanguï pönï Ca ca wætabopa.
⁵Ca ca wæbo adinque nê aadäni nê
Picænäni iñönäni adocanque nê Picængä
incæ botö imo, “Wädämaï ië. Wæætê
cöwä ae, angantapa. Adocanque
onguiñængä iñömö mäninta wi
æmpoquingä a ongongampa. Awënë
Dabii Pæingä incæ tömengä iñömö
docä Oodaa pæinäni nänï cabo iñonte
nê nêöö bai tæi ëmönongä inte nê gänä
cæcä ingaingä ingampa. Tömengä iñömö
edæ eyepæ inte tee bædedinta önompo
æmæmpoque go mentaa wi æmpodisque
dadi ompointa wi æmpocæcäimpa,”
angantapa.

⁶Ayæ Wængongui Codotedo nänï
wänönäni nê wæningä bai ingä atabopa.
Tömengä Awënë Wængongui nänö aacæ
tæ contayömö tæcæguedê ongöñongä
müinäni quëwänäni mënaa go mënaa
inänï tönö nê aadäni nê Picænäni

godämæ a ongönäni atabopa. Tömengä
iñömö önömoncawæncoo önompo
æmæmpoque go mëwäa ëmoncadinque
awinca önompo æmæmpoque go
mëmonga ëmongacäimpa. Edæ
Wængongui Önöwoca incæ önompo
æmæmpoque go mëwoga önöwocaidi
bai nänö ëwocadö bai mänüi awincacoo
inänipa. Adodäni önöwocaidi inänite
inguipoga da pönongä pöninque
tömänäni inguipoga tömämæ gote
cæwodäni inänipa. ⁷Ayæ Wængongui
Codotedo iñömö Awënë tæ contayömö
pöninque nê tæ contadongä önönempo
tömempo inö dadi ompointa nänö
næäninta ö ængantapa. ⁸Tömengä
mäninta ö ængä ate mëa go mëa müinäni
quëwänäni tönö nê aadäni nê Picænäni
bæinticoatodo ganca mänimpodäni
Wængongui Codotedo weca ponte ædæ
wæänänitapa. Iinäni tömänäni ampoqui
adapa nänï änö næäninque owæta oodo
inte nänï badöinta ogui waaqui eyede
enga næänänitapa. Wængongui quinäni
tömengä ingante nänï apænedö iñömö
mänüi ogui waaqui bai impa. ⁹Tömänäni
mä äninque iïmaï ante ämotamini ante
änänitapa.

“Bitö imite wänönäni nê wänümi
inte bitö nö waa pönï inömi iimipa.
Iinque bitö eyepæ inte dadi
ompointaa ante tee bædedinta wäa
wäa ænete wi æmpoquimi iimipa.
Waadäni nänï cabo waodäni nänï
cabo incæ wadö nänï tedecabo
wadö nänï tedecabo incæ
wacä awënë nänï cabo wacä
awënë nänï cabo incæ wabæca
nänï quëwencabo wabæca nänï
quëwencabo incæ waodäni
inänite bitö,
Wængongui quimüni bacæmüinipa,
ante cædinque nämä wepæ
godonte ængabiimpa.

¹⁰Bitö nempo quëwëninque tömänäni
bitö tönö godongämæ aadäni
bacædänimpa, ante badongabiimpa.
Mönö Wængongui ingante
cæcædänimpa, ante bitö pönö
cæbi ate tömänäni,

Mönö Awënë Odeye Wængongui
qui, ante nē godönäni bagainäni
inänipa.

Mäninäni edæ awënëidi badinque
inguipoga quëwënäni inänite
aacädänimpa.”

ante ämotamini änänitapa.

¹¹Ayæ ayömo Wængongui anquedoidi
iñömö bacoo inäni inte ämotamini
änäni ëñëninque, Tömënäni æpodö
miido ganca inänii, ante botö ædö cæte
tee mampote ëñënguimoo. Edæ miinäni
quëwënäni tönö nē aadäni nē Picænäni
tönö Awënë tæ contaimpa gäänë
tæcæguedë ongöñönänite Wængongui
anquedoidi iñömö yabæque godämæ
gongænte ongönänitapa. ¹²Mäniñömö
godämæ ongöninque tömënäni
yedæ äninque iimaï ante ämotamini
änänitapa.

“Wængongui Codotedo ingante
wänönäni nē wæningä inte
tömengä nö waa pönï inongä inte
eyepæ ingampa.

Tömengä edæ tæï piñængä ingänö
anguënë.

Tömengä quincodö incæ tömancoo
nē ëacä inte tömänö ante
ëñënongä ingänö anguënë.

Tömengä tæï piñænte inte tömää
nänö cæinënö cædongä ingampa.

Tömengä ingante, Bitö imite waa
amönipa. Bitö ñäö ëmomidö
anguënë, ante bitö imite watapæ
apænëmönipa,” änänitapa.

¹³Ayæ Wængongui nänö badongainäni
öönædë quëwënäni incæ inguipoga
quëwënäni incæ tadömgadë
quëwënäni incæ gäwapëntibädë
quëwënäni incæ tömänäni adoyedë iimaï
ante ämotamini ante änäni ëñëntabopa.

“Awënë tæ contaimpa nē

tæ contadongä ingante ayæ

Wængongui Codotedo ingante
tömëna inate iimaï ämönipa.

Minatö iminate watapæ ämönipa.

Minatö iminate waa amönipa.

Minatö ñäö ëmöminadö anguënë.

Minatö tæï piñämïna iminadö
anguënë.

Wantæpiyæ iñonte mäninö ante
cöwë ancæmönimpa,” ante
änänitapa.

¹⁴Ante äñönäni mëa go mëa miinäni
quëwënäni adobaï, “iimaï baquinö
anguënë,” ante, “Amëë,” änänitapa.
Ayæ nē aadäni nē Picænäni iñömö ædæ
wææninque watapæ änänitapa.

Tee bædinta önompo æmæmpoque go mentaa

6 ¹Ayæ Wængongui Codotedo iñömö
tee bædinta önompo æmæmpoque
go mentaa incæ yewæmöinta dadi
ompointa tee bædedinta tänota wi
æmpoyongä atabopa. Ayæ mëa go mëa
miinäni quëwënäni incæ adocanque
iñömö tömengä nänö tedepämo detæbo
të bai inte botö imote, “Pöe,” ante yedæ
angä ëñëntabopa. ²Tæcæ ayömo cabayo
näämænta ëñacä do a ongongä atabopa.
Cabayo inte nē tæ contacä iñömö to
piyæncaimpa næængantapa. Tömengä
iñömö wadäni inänite guëadö guëa
cæte tæï ëmongä inte gänä cædongä
iñongante Awënë poganta pönönäni
æninque tömengä wæætë guëadö
guëa cæcæte ante cabayo mongænte
gocantapa.

³Ayæ Wængongui Codotedo wæætë
tee bædedinta wataa wi æmpoyongante
mëa go mëa miinäni quëwënäni incæ
wacä iñömö botö imote, “Pöe,” angä
ëñëntabopa. ⁴Ayæ wacä cabayo opatawæ
gonga ëmö bai ëñacä pongantapa.
Wadäni incæ wacä ingä wacä ingä
wænönædänimpa, ante cædinque
Wængongui godö angä beyænque
cabayo inte nē tæ contacä iñömö,
Inguipoga quëwënäni piyænë cædämaï
incädänimpa, ante nē cæcä bacantapa.
Ayæ, tömengä ingante ñænæ yaëmë bai
pönönäni ængantapa.

⁵Ayæ Wængongui Codotedo
wæætë tee bædedinta wataa wi
æmpoyongante mëa go mëa miinäni
quëwënäni incæ ayængä iñömö botö
imote, “Pöe,” angä ëñëntabopa. Tæcæ
ayömo cabayo wentamö ëñacä do a
ongongä atabopa. Cabayo inte nē tæ

contacā iñōmō tee manguī ōnōnempo nāængā ingantapa. ⁶Ayæ mēa go mēa mīināni quēwēnāni weca tedepāmo bai ēñēñōmo, “Todigomō tōnō tebadamō nāni cænguimō, ante nangūi nāni godonte æimō impa, ancæte ante iīmaī angā ēñentabopa. Tōmāā itædē cædāni ate nāni cæganca beyæ todigomō mēa diboda pōni tee manguī ganca māninquē godonte æncædānimpa. Adobaī tōmāā itædē cædāni ate nāni cæganca beyæ tebadamō ōnōmpo æmæmpoque go adoque diboda tee manguī ganca māninquē godonte æncædānimpa. Ayæ oginguipæ ante odibomō nāni æmō eyepæ pæcæimpa, ante ee aedāni. Biinōmæ ante yowe eyepæ pæcæimpa, ante ee aedāni.”

⁷Ayæ Wængonguī Codotedo wæætē tee bædedinta wataa wi æmpoyongante mēa go mēa mīināni quēwēnāni incæ tōmangā iñōmō botō imote, “Pōe,” angā ēñentabopa. ⁸Tæcæ ayōmō cabayo nāmēnāa ēñacā do a ongongā atabopa. Cabayo inte nē tæ contacā iñōmō tōmengā ēmōwo, Nē Wænōinengā, ante pemonte ēmongantapa. Waodāni nāni wænte ongōñōmō awēnē tōmengā miñæ tee empo pongantapa. Wængonguī Codotedo pōnō cæcā beyænque tōmēna inguipoga quēwēnāni inānite adinque mēnaa go mēnaa iñōnānite adocanque ingante wænōninquē ayæ wadāni mēnaa go mēnaa iñōnānite adocanque ingante wænōninquē nangūi ināni inānite nē wænōna badatapa. Tōmēna pancadāniya inānite yaēmenca nē wænōna badatapa. Ayæ tōmēna godō cæda beyænque waodāni pancadāniya gue ænente nāni wænguimāmo pō wæncædānimpa. Ayæ tōmēna godō cæda beyænque pancadāniya quingæ wodonte nāni wænguimāmo pō wæncædānimpa. Ayæ tōmēna godō cæda beyænque pancadāniya babæidi wænōnāni beyæ wæncædānimpa.

⁹Ayæ Wængonguī Codotedo wæætē tee bædedinta wataa wi æmpoyongante botō, Wængonguī quī, ante nāni wēmonca iya tāimoga ænōmengadæ

iñō waodāni ōnōwocaidi owodāni atabopa. Mānīnāni Wængonguī nānō angainō ante nē ēñente cædāni inte, Itota mōnō Codito inongā ingampa, ante, Nō ante impa, ante apænedāni beyæ tōmēnāni inānite wænōnāni wængaināni inānitapa. ¹⁰Adodāni yedæ āninquē iīmaī ānānitapa, “Awēnē Wængonguī bitō tōmānāni inānite nē Aabi iñōmi imipa. Edæ tæiyæ waēmō iñōmi inte bitō nē nō ante apænebi imipa. Ininquē inguipoga quēwēnāni mōnitō imōnite nē wænōnīnāni inānite æiquedō apænte anguimī. Ayæ mōnitō wepæ mōni gowepæ beyæ ante tōmēnāni inānite æiquedō panguimīi āmōnipa.”

¹¹Mānīnāni tōmānāni inānite tōmengā doyæncōo nāāmæntacōo pōnongā ænānitapa. Æñōnānite, “Wædænque ayæ ee ongōedāni,” āninquē tōmengā, “Mīnitō imīnite do wænōnāni wæmīni bai wadāni mīni tōniñadāni ayæ mīināni quēwēnāni inte mīnitō tōnō Wængonguī ingante nē cædōnāni inānite wænōncædānimpa. Iñāni inānite wænonguēnēnāni inānipa, ante Wængonguī nānō ānō bai tōmēnāni inānite iinquē nāni wænonganca ee ongōedāni,” āmopa, ante angantapa.

¹²Ayæ Wængonguī Codotedo wæætē tee bædedinta wataa wi æmpoyongā atabopa. Māniñedē tæimō goinque ocæ ocæ gotimpa. Waodāni tōmēnāni guidengā wængā ate wæwente beyænque wentamoncoo mongæñāni bai nænque iñontobæ adobaī wentamō pōni ēmō batimpa. Apāicā pæibo iñedē incæ wepæ bai opatawæ ēmō batimpa. ¹³Ayæ nēmōncōo oōnædē iñō owocōo iñōmō wææ tæ ayæ waa wææ tæ ayæ waa wææ tæ inguipoga iñōmō tæ wææninquē iigowæmō ayæ icadāmaī iñonte nangūi woboyæ pæmæñonte woga woga cædinque tæ wæænte bai adobaī tæ wæænānitapa. ¹⁴Ayæ oōnæ incæ mincayonta dadi ompote bai dæ ā batimpa. Ayæ tōmanquidi tōmāā wāā tēiwæñē iñontobæ wayōmō gote dæ ā bai inimpa.

¹⁵Ayæ awēnē odeyēidi incæ ñænēnāni inte nē cædōnāni incæ tontadoidi

awënëidi incæ në nangui äädäni incæ tæi pīñante cädäni incæ tömënäni guñente badänitapa. Ayä awënë në godonte äningä beyænque në cæte quëwënäni incæ nämanque cæte quëwënäni incæ tömënäni tömänäni guñente badänitapa. Guñente badinque tömënäni änanquidi æite ontatodë iñömö wë womönänitapa. Ayä onquiyaboga dicabocodë tæcæguedë go guite wë womönänitapa. ¹⁶Ayä woadäni inänite aa pete bai tömënäni, “Onquiyaboidi ëñeedäni, dicaboidi ëñeedäni, Awënë tæ contaimpaa në tæ contadongä mönitö imönite adämai incæcäimpa, ante cædinque mīnitö mönitonga tæ wæante beocaedäni,” ante aa pedänitapa. Ayä, “Wængongui Codotedo ængui badinque mönitö imönite pänämai incæcäimpa, ante cædinque tæ wæante beocaedäni,” ante aa pedänitapa. ¹⁷“Edæ tömëna nana nangui pönī ængui baquïönæ do ba ininque æcänö ayä quëwenguingä. Edæ dæ ä inguinö angüenë,” ante wædänitapa.

**Wængongui anquedo nänö
në yewämöinäni**

7 ¹Ayä ate Wængongui anquedoidi mënaa go mënaa ongönäni atabopa. Adocanque yædæcapæ inö ongöñongante wacä yæwainö ongöñongante wacä imatæ betamonca inö ongöñongante tömangä æmatæ betamonca inö a ongongantapa. Ininque, Woboyä mëa go mëa iñonte mönö a ongönö inö inguipoga go pämmänämai, ante cædinque cädänitapa. Tömënäni ömaa iñömö incæ gäwapæntibæ iñömö incæ adobai tömäo awæncoo pæyömö incæ woboyä pämmänämai ingäimpa, ante cädänitapa. ²Wacä anquedo nænque tamönö inö pongä atabopa. Tömengä Wængongui në Quëwengaingä nänö yewämöingö næænte pongä atabopa. Wængongui anquedoidi mënaa go mënaa inäni iñömö inguipoga incæ gäwapæntibæ incæ wo ëwente cæcädänimpa, ante

cædinque Wængongui godö cæcä beyænque tæi pīñänäni badänitapa. Mäninäni inänite Wængongui anquedo ñöwo pönningä yedæ aa pecantapa. ³“Ee ongöedäni. Edæ mīnitö inguipoga incæ gäwapæntibæ incæ awæncoo incæ ee wo ëwënämai iñöminite mönitö Wængongui ingante në cädäni nani önönemö inö tömengä nänö yewämöi ante täno yewämöncæmönimpa. Yewämömöni ate mīnitö mäniñedë ate wo ëwente cæedäni.”

⁴Ayä yewämöinäni æpodänidö badänitapa, ante apænecä ëñentabopa. Tömänäni yewämöinäni inte tiento coadenta i coatodo müido ganca inänitapa. Idægoidi nani cabo tipæmpoga go mencabodäniya iñönänite iñämai yewämöinäni badänitapa.

⁵Wëenëñedë Oodaa wodi pæinäni nani cabo iñönänite në yewämöinäni iñömö tipæmpoga go mëa müido ganca inänitapa. Ayä Odobeë wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa. Ayä Gado wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa.

⁶Ayä Atedo wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa. Ayä Nempatadii wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa. Ayä Mänatee wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa.

⁷Ayä Timeönö wodi pæinäni nani cabo iñönänite në yewämöinäni wæä tipæmpoga go mëa müido ganca inänitapa. Ayä Debii wodi pæinäni nani cabo iñönänite në yewämöinäni wæä

tipæmpoga go mēa miido ganca
inānitapa.

Ayæ Itacado wodi pæināni nāni
cabo iñōnānite nē yewæmōināni
wææ tipæmpoga go mēa miido
ganca inānitapa.

⁸Ayæ Tabodöo wodi pæināni nāni
cabo iñōnānite nē yewæmōināni
wææ tipæmpoga go mēa miido
ganca inānitapa.

Ayæ Ootee wodi pæināni nāni cabo
iñōnānite nē yewæmōināni wææ
tipæmpoga go mēa miido ganca
inānitapa.

Ayæ adobai Beencaminö wodi
pæināni nāni cabo iñōnānite nē
yewæmōināni wææ tipæmpoga go
mēa miido ganca inānitapa.

Tæiyænāni näämæntacoo mongænte a ongōninque

⁹Ayæ ate wæætē ayōmō tæiyænāni ināni
a ongōnāni atabopa. Æpodānidō ināni,
ante æcānō tee mampote anguingāā.
Mānināni wabæca nāni quëwencabo
wabæca nāni quëwencabo inte tæiyænāni
incæ waodāni nāni cabo waodāni nāni
cabo inte tæiyænāni incæ wacā awënë
nāni cabo wacā awënë nāni cabo inte
tæiyænāni incæ wadō nāni tedecabo
wadō nāni tedecabo inte tæiyænāni incæ
mānōmaï inōnāni inte ongōnānitapa.
Iñāni iñōmō näämænta weocoo doyæncoo
mongænanī inte yædēmæmāa önönempo
nææninque Awënë nānō aacæ tæ
contaimpa gäänē ongōninque Wængongui
Codotedo weca a ongōnānitapa. ¹⁰Ayæ
tömēnāni yedæ āninque iïmaï ānānitapa.

“Mönö Wængongui iñōmō tömengä
nānō aacæ tæ contaimpa nē tæ
contacā inongä inte
tömengä adocā mönō imonte,
Quëwencæminimpa, ante nē
Ængä inongä ingampa.

Ayæ Wængongui Codotedo adobai
mönö imonte, Quëwencæminimpa,
ante nē Ængä inongä ingampa,”
ānānitapa.

¹¹Nē aadāni nē Picænāni tönö mēa
go mēa miināni quëwēnāni Awënë

tæ contaimpa gäänē ongōnānite
Wængongui anquedoidi tömānāni
iñōmō yabæ inō godāmæ ongōnānitapa.
Wængongui nānō aacæ tæ contayōmō
gäänē guidōmēmæ ædæ wææninque
tömēnāni Wængongui ingante, Bitō
Wængongui Awënë imidō anguēnē,
ante watapæ apænēdānitapa. ¹²Ayæ
ānānitapa.

“Amëē. Mönö Wængongui ingante
watapæ apænēmōnīpa.

Ayæ tömengä nāō emongānō
anguēnē. Tömengä tömānō ante
ēñēnongä ingānō anguēnē.

Tömengä ingante waa adinque
mōnitō tömengä ingante waa ate
pōnente apænēmōnīpa.

Ayæ tömengä tæi piñængä ingānō
anguēnē.

Tömengä tæi piñængä inte tömāā
nānō cæinēnō cædongä ingampa.

Wantæpiyæ iñonte cōwē māninō
ante ancæmōnīpa.

Mānōmaï baquīnō anguēnē, ante,
Amëē,” ānānitapa.

¹³Ayæ nē aadāni nē Picænāni incæ
adocanque botō imo āninque, “Iñāni
näämæntacoo doyæncoo nē mongænāni
iñōmō æmōnānidō inānitawo. Edæ
ædōnō quëwēnāni inte pōnānitawo,”
angantapa. ¹⁴Åñongante botō tömengä
ingante, “Awënë bitō tömēmi do
ēñēmīpa,” antabopa. Åñōmote tömengä
wæætē, “Mānināni nangui nāni
wæwengaimāmo iinque baganca incæ
ayæ miināni quëwēnāni inānīpa. Edæ
tömēnāni weocoo doyæncoo, Waēmō
pōni bacæimpa, ante Wængongui
Codotedo wepænē yamongaināni
inānīpa,” ante nē aacā nē Picængä
apænecantapa.

¹⁵Ayæ adocā godōmenque
apænecantapa.

“Mānōmaï beyæ Wængongui nānō
aacæ tæ contaimpa gäänē a
ongōninque tömēnāni
itædē incæ woyowotæ incæ
Wængongui oncō tæiyæ waēmō
oncōnē tömengä ingante cōwē
cædānīpa.

Īnque oncontai bai tömēnāni
wānōmēnāca wo cēcā bai
cædinqe mānimpaa nē tæ
contadongā ĩñōmō
tömēnāni ĩnānite ante wæc
aacæcāimpa.

¹⁶ Tömēnāni cōwē gue ænēnāmaī tepæ
gæwænāmaī incædānimpaa.

Nænque tömēnāniya tī nāwānāmaī
ī ĩnque tömēnāni gōnāmaī
incædānimpaa.

Quiēmē ocoī ā beyænque tömēnāni
gonte ĩnāmaī inguinānidō
anguēnē.

¹⁷ Edæ Wængonguī Codotedo
Wængonguī nänö aacæ tæ
contayōmō gāänē nē a ongongā
ĩñōmō

tömēngā ĩñōmō mānīnāni
nāāmāntacoo nē mongænāni
ĩnānite nē aacā incæcāimpa.

Tömēngā edæ tömēnāni ĩnānite
quēwenguīmæ tapæñōmō ĩñōmō
ænte māocā goquīnāni.

Ayæ Wængonguī tömēnāni
wēñapæ nāni tamonte wædī
tömāmæ wadæ cæmoncæcāimpa,”
angantapa.

Tee bædedinta tömanta wi æmpocampa

8 ¹ Ayæ Wængonguī Codotedo
tee bædedinta tömanta wi
æmpoyongante öönædē ĩñōmō mēdia
ooda ganca nōwæ ongonte batimpa.
² Ayæ anquedoidi öonpō æmæmpoque
go mēa ganca ĩnāni Wængonguī
weca nē a ongōnāni ĩnānite atabopa.
Mānīnāni ĩnānite tömēngā todompeta
nāni ancade öonpō æmæmpoque
go mencadea ganca pædæ godongā
ænānitapa. ³ Ayæ wacā anquedo ĩñōmō
oguī waaquī iya tāincade oodo inte nāni
badöincade nææninqe, Wængonguī
quī, ante nāni iya tāimpa gāänē ponte
a ongongantapa. Mānimpaa oodo inte
nāni badöimpa Wængonguī nänö
aacæ tæ contaimpaa gāänē ongōnimpaa.
Ayæ, Wængonguī quīnāni tömēngā
ingante apæneyōnāni bitō oguī waaquī

tancæbiimpaa, ante cædinqe adocā
anquedo ingante wacā pōninqe nanguī
oguī waaquī godongā ængantapa. ⁴ Ænte
öonpō næænte oguī waaquī iya tangā
ĩnque tēemāmāmo Wængonguī weca
æipāmoyedē Wængonguī quīnāni
tömēngā ingante nāni apænepāmo
guēa adoyōmō æipāmotimpaa. ⁵ Ayæ
adocā anquedo ĩñōmō oguī waaquī iya
tāincade æninqe iya tāimoga gonga
ænte eyede wēninqe inguipoga ĩñōmō
wææntodongantapa. Wææntodongā
ate detæbo tæi tæi tē goyō yedæ pōnī
ānimpaa. Yædæ yædæ nānimpaa. Ayæ
goinqe gotimpaa.

Todompeta nāni ancade

⁶ Ayæ Wængonguī anquedoidi
öonpō æmæmpoque go mēa ganca
ĩnāni todompeta nāni ancade öonpō
æmæmpoque go mencadea ganca nē
næænīnāni inte todompeta öönōne gō
cædedinqe we we öoncæ cædānitapa.

⁷ Wængonguī anquedo tānocā ĩñōmō
tömēngā todompeta inte we we öongā
ate yoguica gonga tōnō wepæ adoyōmō
wempodente bai inguipoga ĩñōmō
tæ tæ wæænimpaa. Tæ tæ wææ ate
inguipoga ĩñōmō pancabaa nanguī ömæ
ĩñōmō gonte batimpaa. Awæncōo ĩñōmō
pancacooga incæ adobai nanguī incoo
gonte wænimpaa. Gaguīmæncōo ĩñōmō
tōmancoo gonte batimpaa.

⁸ Wængonguī anquedo ayængā ĩñōmō
tömēngā todompeta inte we we öongā
ate ñænæ onquiyabo emō bai gonga
bæcodote bai ĩñonte wææntodōnāni
gāwapæntibaa tæi tæi guīitimpaa. Tæi tæi
guīi ate gāwapæntibæ ĩñōmō pancatibaa
incæ nanguī pōnī æpæ ĩñōmō wepæ
batimpaa. ⁹ Ayæ gāwapæntibæ cæncadēmæ
ĩnō quēwēnāni ĩñōmō pancadāniya
incæ nanguī ĩnāni wænānitapa. Ayæ
ñænæ wipocoo pancacooga incæ nanguī
wo cæwodincoo ĩñōmō wo ewente
guīitimpaa.

¹⁰ Wængonguī anquedo ayængā ĩñōmō
tömēngā todompeta inte we we öongā
ate ñænæ nēmō ĩñōmō cadentato tica
wodōnote bai öönædē ĩnō owodēmō

incæ tæ wææninqe ōnoncooga iñōmō pancacooga incæ nanguī æpænē iñōmō tæi tæi guuitimpa. Æpæ tayōmō adobaī cæncadēmæ inō tæi tæi guuitimpa

¹¹Mānīnēmō ēmōwo iñōmō, Tī Nānēmō, ante nāni ānēmō impa. Nēmō tæi guuiyonte nanguī æpæ iñōmō moncapæ baī ti nāmæ batimpa. Waodāni tæiyænāni iñōmō imæ ti nāmæ bagaimæ bete wænānitapa.

¹²Wængonguī anquedo ayængā iñōmō tōmēngā todompeta inte we we ōngā ate nænque pancayōmōnga tente ba ate apāicā adobaī pancayōmōnga tente ba adinqe nāna apāidīnō iñōmō panca wēmō batimpa. Nēmōncōo iñōmō pancadāniya incæ nanguī ināni wo ēwente badāni ate nāni apāidīnō iñōmō panca wēmō batimpa. Itædē iñōnte tipæmpoga go mēa ooda ganca iñō mēa go mēa ooda ganca nænque nāō apāidāmai inimpa. Ayæ woyowotæ iñōnte tipæmpoga go mēa ooda ganca iñō mēa go mēa ooda ganca apāicā tōnō nēmōncōo apāidāmai inānitapa.

¹³Ayæ ayōmote guingāmōwæ ōnædē gāmænō pao pao godinqe iīmai ante aa pecā ēñentabopa. “Inguipoga quēwēnāni nāni wæquinque. Nāni wæquinque. Nāni wæquinque impa, angantapa. Edæ Wængonguī anquedoidi mēnaa go adocanque ināni inte tōmēnāni todompeta inte we we ōncæ cædāni beyænque inguipoga quēwēnāni iñōmō nanguī pōni wæwenguināni bacædānimpa,” ante guingāmōwæ angantapa.

9 ¹Wængonguī anquedo ayængā iñōmō tōmēngā todompeta inte we we ōngā ate wa nēmō ōnædē inō owođinqe inguipoga tæ wæængainēmō ongō atabopa. Mānīi nēmō ingante tadōmengadænguipo ontatodē wi ænequī godonte inimpa.

²Wi ænequī æninqe ontatodē wi ænecā ate tēemāncōo ta æitimpa. Mānīi tēemāncōo nænæ gongapamō tēemāncōo baī inimpa. Ininqe iī tēemāncōo tadōmengadænguipo ontatodē ta æiyonte nænque tōnō ōnæ

wentamō pōni badaimpa. ³Tēemāncōdē inō nāwāi ta pōninqe inguipoga iñōmō wæænōnānite wacā godō cæcā beyænque tōmēnāni tæimō badinqe emēne inguipoga quēwēnāni baī tæ guidāni badānitapa. ⁴Ayæ tōmēnāni inānite, Inguipoga gaguimāncōo incæ gæpæñabocōo incæ awāncōo incæ pæcōo wo ēwēnāmai iedāni. Wæætē waodānique ōnōmō inō Wængonguī nānō yewāmōi inte nē yewāmōnāmai ingāināni inānite adinqe mīnitō tōmēnāni inānite godō cæmīni beyænque nantate wæcædānimpa, ante wacā angantapa. ⁵Ayæ nāwāiidi inānite edæ, Wænōedāni, ānāmai ingā inte tōmēngā, Mīnitō wæætē tōmēnāni inānite ōnōmpo æmæmpoque apāicā ganca cæmīni beyæ nanguī pōni wæwæncædānimpa, angantapa. Ininqe emēne tæ guī waocā nantate wæcā baī tōmēnāni nanguī pōni nantate wæwēnāni inānitapa.

⁶Māniñedē waodāni, Æbānō cæte wænguimoo, ante anca cæđinqe wænāmai incædānimpa. Wæinēmōnīpa, ante ānāni incæte ædō cæte wæmainānīi.

⁷Ayæ nāwāiidi iñōmō tontadoidi cabayoidi guēadō guēa cæte nē godāni baī adobaī ēmōnānitapa. Tōmēnāni ocaboga awēnē poganta oodo inte badōnīnta baī wæncædānitapa. Ayæ mānīnāni awīnca iñōmō waodāni awīnca baī ēmōnānitapa. ⁸Tōmēnāni ocaguī iñōmō onquiyængā ocaguī baī encadinqe tōmēnāni bagacōo iñōmō nēō бага baī engadānitapa. ⁹Tōmēnāni tæcætawē inō tæineta inte badōinta baī wææ mongænānitapa. Ayæ tontadoidi guēadō guēa wænoncæte ante cæđinqe ānāni ate cabayoidi pogodo gote awoto baī wēa pōnōnte nanguī pōni ā baī nāwāiidi iñōmō adobaī ōnonguēnepæ pao pao godinqe āmæ godānitapa. ¹⁰Tōmēnāni ōnōmīñæ incæ emēne ōnōmīñæmpa baī ēmīñænānitapa. Tōmēnāni nāni tæi pīñæmāmo ōnōmīñæ inō ēmīñænāni inte ōnōmpo æmæmpoque apāicā ganca godō cædāni beyæ waodāni nanguī

pöni wæwänänitapa. ¹¹Mäniiñāwāiidi iñömö awënë odeye ingante ēñente quëwänänitapa. Māningā tōmēnāni awënë iñömö tadōmengadænguipo iñömö quëwänāni inānite nē aacā anquedo inongā inte tōmengā ēmōwo ebedeo tededō, Abadoō, nāni āwo ī ayæ, Nē Wo Ēwengā, ante ēmongā ininque guidiego tededō, Apodiōō, ante pemōnānīpa.

¹²Tāno nāni wæquinque do iinque batimpa. Incæte godōmenque mempoga ganca nanguī pōni nāni wæquinque ayæ baquīnō anguēnē.

¹³Wængonguī anquedo ayængā iñömö tōmengā todompeta inte we we ōongā ate tedepāmo tēñō ēñentabopa. Oguī waquī iya tāimpa oodo inte badōimpa Wængonguī weca mæ ongompa. Mānimoga ōnōmoncawæ bai mēa go mēa mæ ongōñōmō māniñōmō tedepāmo tēñō ēñentabopa. ¹⁴Wængonguī anquedo ayængā todompeta nē næængā ingante iīmaī angantapa. “Nænæ ōnonga Eopadatedō nāni ānonga iñömö anquedoidi mēnaa go mēnaa ināni iñömö nē nā cæyænīnāni inānite bitō ñimpo cæe,” angantapa. ¹⁵Edæ māniñāni anquedoidi mēnaa go mēnaa ināni iñömö tōmēnāni māniñepo iinque ba ate māniī apāicā iñonte māniñōnæ incæ māniī ooda iñonte dobæ nāni cæquinque ante a ongōñōnānite iīmaī angantapa. Waodāni tōmānāni iñömö mencabodāniya go adocabodānique quëwēñōnāni adocabodānique inānite mīnitō wænoncæmīnīmpa, angantapa. Ayæ ñōwo tōmēnāni inānite ñimpo cæcā ate tōmēnāni wænoncæte ante tao godānitapa. ¹⁶Ayæ tontadoidi iñömö cabayo mongæināni ināni æpodānidō ināni, ante tee mampote dootiento mīñōō ganca inānitapa. Mānimpodāni inānīpa, ante ēñentabopa.

¹⁷Botō wiimonte bai ayōmo cabayoidi tōnō nē mongæināni iñömö iīmaī ēmōnāni atabopa. Cabayo nē mongæināni iñömö tæcætawē inō tæineta nāni wææ mongæntacoo

pancataa opatawæ gonga gonte bai ēmontapa. Pancataa wentamō ēmontapa. Pancataa atopode nāni ā bai wiñadæ ēmō bai ēmontapa. Cabayoidi ocabo iñömö nēōō ocabo bai encadānitapa. Tōmēnāni ōnōne inō gonga tōnō tēemā tōnō atopode nāni ōō waadō tadedānitapa. ¹⁸Māniī gonga tōnō tēemā tōnō atopode iñömö mēmāmoque go adopāmoque nāni wænōmāmocoo nē tadedāni inte cabayoidi iñömö waodāni tōmānāni mencabodāniya go adocabodānique quëwēñōnāni adocabodānique inānite wænōnāni wænānitapa. ¹⁹Māniñāni cabayoidi tōmēnāni ōnōne inte tæi pīñænte wænōnīnque adobai tōmēnāni ōnōmīñæ inte tæi pīñænte wænōnānīpa. Edæ tōmēnāni ōnōmīñæ iñömö tæntæ ocabo bai ēmīñænāni inte waodāni inānite pocænāni wænānitapa.

²⁰Mānimāmo wodonte nāni wængaimāmocoo beyæ ayæ wænāmaī quëwänāni inte wæwänāni incæte tōmēnāni nāni wænæ wænæ cægainō ante, Ancaæ wæwente awædō, ante pōnēnāmaī ināni inte ñimpo cædāmaī inānitapa. Wæætē oodo inte padata inte bodonte inte dica inte awæmpa inte tōmēnāni nāni badonte cōnōnincoo iñömö adāmaī incoo incæte ēñēnāmaī incoo incæte dao dao godāmaī incoo incæte tōmēnāni, Mōnitō wængonguīdi inānīpa, ante ædæ wæænte apænedinque ñimpo cædāmaī inānitapa. Ayæ adobai wænæidi inānite ædæ wææninque, Mīnitō mōnitō wængonguīdi imīnidō anguēnē, ante ñimpo cædāmaī inte apænedānitapa. ²¹Ayæ māniñāni godōmenque waodāni inānite piinte wænōnāni inte tōmēnāni mīi bete yewænāni inānīpa. Nānōogængā ināmaī iñongante towente cædōnāni inte tōmēnāni awēmō ō ænāni inānīpa. Mānōmaī godōmenque cædinque tōmēnāni nāni wænæ wænæ cægainō ante, Ancaæ wæwente awædō, ante pōnēnāmaī ināni inte ñimpo cædāmaī inānitapa.

**Wængonguï anquedo dadi
ompointa guiyanta nãængä**

10 ¹Ayæ wacä anquedo në täi emongä inte öönädë inö wæængä atabopa. Tömengä weocoo mongænte bai boguimancodë pöningue tömengä ocaboga tæcædæca inö daimë godämæ owotapa. Tömengä awinca incæ nænque bai apäidique tömengä önömënë incæ cobacadewæ gonga gonte emö bai emënenngä ingantapa. ²Tömengä önönempo inö dadi ompointa ininta nãni wi æmpodinta guiyanta nãængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiqüënë ömaa cö cæwacantapa. ³Mänömaï cö cæwadinque tömengä nëöö ii pepa bai nanguï pöni yedæ aa pecantapa. Aa peyongä detæbo önompö æmæmpoque go mëa ganca wæætë täi ténique tededänitapa. ⁴Detæbo önompö æmæmpoque go mëa ganca inãni inömö tededäni ëñëninque botö yewæmoncæ cætabopa. Tæcæ yewæmoncæ cæyömo öönädë inö tedepämo iïmai ante tedecä ëñentabopa. ⁵Inãempa önompö æmæmpoque go mëa detæbo nãni tededö æbänö ante tededänii, ante wii ëñenguï i ininque bitö yewæmonãmaï ie,” angantapa.

⁵Wængonguï anquedo botö adingä inömö gäwapæntibaa tönö ömaa në a ongonngä inömö tömengä önompö tömempo öönädë inö pædæ æmpocantapa. ⁶Tömengä tömempo pædæ æmpodinque, Wængonguï ëñëñongä botö äno ante nöingä baquïno angüënë, ante iïmai angantapa. Edæ në wantæpiyæ cöwë quëwengaingä inte öönädë tömäa inguipoga tömäa gäwapæntibæ tömäa badöninque tömengä adobaï öönädë owodäni tömänäni inguipoga quëwënanäni tömänäni gäwapäa quingänö owodäni tömänäni inänite në badongaingä inte tömengä emöwo apænedinque, Botö apænedö nöingä baquïno angüënë, ante në apænecä inömö, “Mönö ee ongöñedë do iinque batimpa, angantapa. ⁷Edæ

Wængonguï anquedo tömengä pöni inömö tömengä todompeta we we öoncæ cæyongante Wængonguï nänö cæinënë ante wë wodonte bai nänö angainö ante nöwo iinque cæcæcäimpa. Wængonguï ingante në cægäinãni tömengä beyæ në apænegaïnãni inönänite mäninö nänö cæinënë ante do apænegaingä inte Wængonguï mäninö bai nöwo iinque cæcæcäimpa,” angantapa.

⁸Ayæ öönädë inö tedepämo adopämo do botö ëñënë nöwo wæætë botö imote iïmai angä ëñentabopa. “Wængonguï anquedo në gäwapæntibaa tönö ömaa inömö a ongonngä weca godinque bitö tömengä önönempo dadi ompointa ininta nãni wi æmpodinta nänö nãæininta æe,” angantapa. ⁹Angä ëñëninque Wængonguï anquedo weca godinque botö tömengä ingante, Dadi ompointa guiyanta pönömi æmoe, ante äñömo tömengä wæætë botö imo, “Æe. Äninque cæe. Bitö önöne da wëneyömi guiñëmæ bai waëme pöni ingäimpa. Incæte yo mongænte ate cæncadë guiddinque ti nä bacäimpa. Ininque cædente wæcæbiimpa,” angä ëñentabopa.

¹⁰Wængonguï anquedo önönempo dadi ompointa guiyanta æninque botö ade cæntabopa. Önöne guiñëmæ bai waëme pöni i incæte yo mongænte ate cæncadë guiddinque ti nä badinque cædente wætabopa. ¹¹Ayæ botö imote angantapa. “Wacä awënë nãni cabo wacä awënë nãni cabo incæ wabæca nãni quëwencabo incæ wadö nãni tedecabo wadö nãni tedecabo incæ wabæca wabæca nãni awënë odeye cabo inönänite bitö, Mäninãni inänite æbänö baquïi, ante wæætë Wængonguï beyæ apænecæbiimpa,” ante angantapa.

**Wængonguï æbänö cæcää,
ante mënaa apænedapa**

11 ¹Wacä botö imote, Tee manguimpa impa, ante cæwipa bai pædæ pönöninque ayæ botö imote, “Goe, angantapa. Wængonguï

oncö tæiyæ waëmö oncönë godinque mänincö tönö, Wængongui qui, ante nani iya täimpa tee mäe. Ayæ waodäni adoyömö ædæ wææninqe Wængongui ingante, Bitö Wængongui Awënë imidö anguënë, ante watapæ apænedäni iñömö æpodänidö inänii, ante tee mampote cæe. ²Wængongui oncö tæiyæ waëmö oncönë tee mäninque yacö boyäa iñömö tee mänämai ië. Edæ mänincö boyäa wadäni oodeoidi inämai inäni inänite do godonte intapa. Mäninäni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ëwente cæcædänimpa. ³Ayæ botö imotedö ante, Botö æbänö cæboo, ante në, Nö ante impa, ante apænedäni iñönate botö godö cæquimo beyænque tömëna tæi piñænte badinque miido dootiento tetenta ëönæ mänimpöönæ iñonte botö beyæ apæncædäimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæninqe apæncædäimpa,” ante apæncæ ëñentabopa.

⁴Wængongui æbänö cæcää, ante në, Nö ante impa, ante apænedäni iñömö tömëna iñömö Wængongui inguipoga Awënë iñongante tömengä weca odibowæ nani äwæ mëwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵Wadäni, Tömëna inate wënæ wënæ cæinëmopa, ante cædäni ininque tömëna wæætë në piñte cædäni inänite gonga wo tadete bai cædinque wænöna wæncædänimpa. Edæ, Tömëna inate wënæ wënæ cæinëmönipa, ante në cædäni tömänäni mänömai wæncædänimpa. ⁶Wængongui godö cæcä beyænque tömëna tæi piñæna badinque, Wængongui beyæ möna apæneyedë cöönæ cædämai ingæimpa, ante cædinque öönædë tee mönete bai cæcædäimpa. Ayæ tæi piñæna inöna inte tömëna æyedëmë cæinëna incæ wæætë wæætë cæyönate æpæncöo tömancoo wæpænque bacæimpa. Adobai inguipoga

tömämæ quëwëñäni inänite tömëna cæda ate quiëmë wænömämocoo incæ pö wënæ wënæ bacædänimpa.

⁷Ayæ tömëna, Wængongui æbänö cæcää, ante iinque apænedäni ate babæcä bai mönö guiñënongå inte tadömengadænguipo inö tadinque tömëna inate guëadö guëa cædinque tæi ëmongä inte gänä cædinque wænongä wæncædäimpa. ⁸Wænä ate tömëna baonque nænængade nani quëwëñömö taadö iñömö öñoncædäimpa. Edæ Todömä iñömö quëwëñäni wiwa cædäni bai ayæ Equitobæ quëwëñäni wënæ wënæ cædäni bai mänii nænængade nani quëwëñömö në quëwëñäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹Mëönäa go adoönæque go tæcæ itædë iñonte tömëna baö inäni acæte ante pöninque wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwencabo incæ waodäni nangui inäni ponte tömëna baö acædänimpa. Ayæ, Da wënämai ingæimpa, ante wææ cæcædänimpa. ¹⁰Tömëna iñömö Wængongui beyæ në apænedäni inöna inte inguipoga quëwëñäni inänite nangui äna wædinäni inte tömënanäni nïwo wæætë watapæ tocædänimpa. Iinque tömëna mänömai wænte öñöna ate tömënanäni nangui Yæ yæ todinque wacä ingä wacä ingä, Önonque æe, ante pædæ godönäni æncædänimpa.

¹¹Mëönäa go adoönæque go tæcæ itædë iinque go ate Wængongui edæ, Quëwencæmëna, ante tömengä nänö guëmämämo quëwëñäni wöo öongacä ate tömëna iñömö wæætë miina badinque ængæ ganticædäimpa. Ængæ gantiyöna në adäni guiquënë ancaï guiñente wæcædänimpa. ¹²Ancaï guiñente ayönäni tömëna öönædë inö tedepämo yedæ ante ëñencædäimpa. “Iñömö pö æeda,” angä ëñëninque tömëna öönædë inö boguimancodë

æiyöna tömäna inate në piinte cædinäni edonque acædänimpa. ¹³Tömëna æiyedë mäniñedë goinque nanguï ocæ ocæ goquimpa. Tömënanäni näni quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodäni tiæte miido ganca wæncædänimpa. Ayæ miinänäni quëwënanäni ancaï guiñëninque, Wængonguï öönædë në quëwëmi ïmi inte bitö nö tæï piñænte ïmidö angüenë, ante wæcædänimpa.

¹⁴Ayæ mempoga näni wæquinque do iinque batimpa. Incæte godömenque adopoque nanguï pönäni näni wæquinque oo pönäni bacæimpa.

Todo mpeta æmäwoya

¹⁵Wængonguï anquedo tömangä iñömö tömengä todo mpeta we we öongä ate öönædë inö wadäni näni tedepämo yedæ tededinque iimaï änanitapa.

“Mönö Awënë Wængonguï tömengä Codito tönö inguipoga Tæiyæ Awënë Odeyeda badinque wantæpiyæ cöwë aacædäimpa,” änanitapa.

¹⁶Në aadäni në Picænäni iñömö bæinticoatodo ganca inäni mänimpodäni iñömö Wængonguï weca tömënanäni awënë tæ contaimpaa në tæ contadäni inte ñöwo guidömëmæ ædæ wææninqe Wængonguï ingante, Bitö Awënë Wængonguï ïmidö angüenë, ante watapæ apænëdänitapa. ¹⁷Ayæ iimaï apænëdinque,

“Awënë Wængonguï bitö adobique Tömää në Cædömi inte wëenëñedë do në quëwengaïmi ïmi ñöwobi inömi ïmipa. Bitö nämä tæï piñæmi inte ñöwo ædæmö në aabi inömi ïmipa, ante adinque bitö ïmite waa ate pönente apænemönipa.

¹⁸Wabæca wabæca näni quëwencabo incæ tömänäni quëwënanäni ænguï badänitapa. Ayæ bitö ænguï babi ininque

në wængainäni inänite bitö apænte panguiönæ do batimpa.

Ayæ bitö beyæ në apænëdönäni iñömö bitö ïmite në cædönäni iñönänite

tömënanäni inänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ bitö quinäni iñönänite bitö ëmowo ante bitö ïmite në ëñente cædönäni iñönänite

awënë bai inäni incæ öönäninque inäni incæ tömänäni inänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ inguipoga quëwënanäni inänite wadäni në wo ëwente cædönäni iñönänite bitö wo ëwente cæquiönæ do batimpa.”

¹⁹Ayæ öönædë inö Wængonguï tæiyæ waëmö oncö odemö wibænetapa. Wibæneyö Wængonguï, Waodäni æbanö cæte botö tönö godongämæ waa cæte quëwencædänimpa, ante odömoncæte ante nänö yewæmongainca näni da wencaincade iñömö mänincönë mä ongoncade atabopa. Ayömote yædæ yædæ näninimpa. Yedæ pönäni änimpa. Detæbo tæi tæi tëñö yedæ pönäni änimpa. Goinque gotimpa. Ayæ yoguica cöönæ bai nanguï cæte wæænimpa.

Onquiyængä tönö dadagö näni änogä

12 ¹Wængonguï, Mä pönäni odömömo adinque ëñencædänimpa, ante cædinque öönædë inö waëmö pönäni badongä a owo atabopa. Edæ onquiyængä iñömö nænque inte weocoo wëñate bai mongæñongä apäicämo incæ tömengä cæncædëwa ænömengadæwa inö impa. Tömengä, Awënë poganta, ante tipæmpoga go mäa nëmöidi inte godämæ badointa wencacantapa. ²Mäningä onquiyængä yædëmadä ënengä iñongante wëñængä ëñacæ cæcä wæte wædinque wëñæ nantate Yæ yæ wæcantapa.

³İnıne Yæ yæ wæyongante öönædë inö mä pönı Wængongui nänö badöı wadö bai badöı a owo atabopa. Edæ ñænængade obe bai dadagöö nani änogä opatawæ ëñacä inte tömengä ocabocoo öonmpo æmæmpoque go mencaä encacä inte mäniı ocabocooğa awënë pogantacoo öonmpo æmæmpoque go mentaa wencacä ingantapa. Tömengä önömoncawæ adobai öonmpo tipæmpoga ocabocooğa encacä ingantapa. ⁴Tömengä önoncaimñænca picæ cæmiñænıne öönædë owodäni nëmöıdı incæ pancadäniya incæ nangui inäni inänıte wææntodongä inguıpoga tæ wæænänıtapa. Onquıyængä oo pönı inıngante dadagöö, Wëñængä ëñacä ate cæncæboımpa, ante tömengä weca a ongongantapa.

⁵Onquıyængä wëñængä onguıñængä ingante mangä inıne tömengä inö mö nänö Awënë baquinque pæcantapa. Tömengä inö mö tæıyæ awënë tömengä nempo quëwënanı inänıte aacä bai adobai tömämæ quëwënanı inänıte, İımaı cæedäni, ante aacæcäımpa. Mäningä onquıyængä wëñængä ingante wacä ö ænte Wængongui weca ayæ tömengä nänö aacæ tæ contayö mö mäniñö mö ænte mäicä æicantapa. ⁶Mäniñö bayonte wäänä inö mö önomæca inö mö wodıı gocantapa. Tömengä beyæ ante Wængongui nänö eyepæ cæyö mö mäniñö mö wodıı gocantapa. Mäniñö mö müıdo dootıento tetenta ëönæ mänımpoönæ inınte tömengä quëwente beyæ cængui eyepæ pönönäni cæncæcäımpa, ante Wængongui tömengä nänö owoyö mö ante do badongantapa.

⁷Mäniñedë edæ öönædë inö mö guädö guëa cæte wænönänıtapa. Wængongui anquedo Mııguedo nani angaingä inö mö tömengä wadäni anquedoidı awënë inongä ingampa. Tömengä tömënanı tönö dadagöö ingante wıdo cæcæte ante cæyönäni dadagöö wæætë tömengä anquedoidı tönö wæætedö wæætë guëa cædäni incæte ⁸tömënanı ædö cæte gänä

cæquınäni. Edæ ædö cæte öönædë inö mö ayæ quëwenguınäni, ante tömënanı inänıte wıdo cædänıtapa.

⁹Tömënanı inö mö ñænængade dadagöö ingante wıdo cæte wææntodönänıtapa. Mäningä dadagöö inö mö wëñëñedë tæntæ ingaingä inte tömengä ëmöwo Wënæ Tatäna mëwoga ëmongä ingampa. Adocä, Inguıpoga quëwënanı tömänäni oda cæcædänımpa, ante në wapıticæ ænte mäocä ingampa. Tömengä ingante ayæ tömengä anquedoidı inänıte inguıpoga inö mö wıdo cæte wææntodönänıtapa.

¹⁰Ayæ ate öönædë inö tedepämo yedæ ante İımaı ä ëñentabopa.

“Nöwoönæ mönö Wængongui mönö İmonte, Mıniıtö botö æmæwo æmo beyænque quëwenguımıni, ante tömengä nänö cæönæ batımpa.

Ayæ tömengä nänö tæı piñænö ñöwoönæ ba inıne tömengä adobai Tæıyæ Awënë Odeye ñöwoönæ bacäımpa.

Ayæ tömengä nänö apænte ængaingä mönö Codıto adobai nämä tæı piñænongä inte në angä bacäımpa.

Wënæ guıquënë mönö tönıñädäni inänıtedö ante, Wënæ wënæ cædänıdö angüënë, ante wapıticæ apænete änewënongå ingampa.

Woyowotæ incæ itædë incæ mönö Wængongui weca a ongöniıne tömengä mäniñäni inänıtedö ante në wapıticæ änewënongå inıngante tömengä ingante inguıpoga inö mö wææntodönäni wæængantapa.

¹¹Wængongui Codotedo wepæ tömengä nänö wænte godongaimæ beyænque tæı ëmönäni badıne mönö tönıñädäni inö mö wënæ ingante gänä cædänıtapa.

Ayæ, Wængongui æbänö cæcää, ante tömënanı nani apænedö beyænque tömënanı tæı ëmönäni badıne wënæ ingante gänä cædänıtapa.

Wadäni tömënanı inänıte Wængongui beyæ wænönæ cæyönäni tömënanı,

Mōnitō guīñēnāmaī
wāncāmōnīmpa, ante nē ānāni
īnānitapa.

¹² Mānōmaī beyā mīnitō ōōnāēdē
īñōmō nē quēwēmīni inte watapā
tocāmīnīmpa.

Wamīni guīquēnē inguīpoga īñōmō
āpāntībādē īñōmō nē quēwēmīni
inte mīni wāquinque ingāīmpa.
Edā wēnā mīnitō weca wāē pō
quēwēngāīmpa.

Tōmēngā nānō wo ēwēnguīnō oo
pōnī impa, ante ēñēnte beyānque
āīngā pōnī bacampa.

Mānōmaī beyā mīnitō
guīñēnguīmāmo baquinque impa.”

Mānōmaī ante yedā angā ēñēntabopa.

¹³ Ayā dadagōō, Botō īmote inguīpoga
īñōmō wido cāte wāēntodōnāni adī
wādō, ante wādinque onquiyāngā
ingante wēñāngā onguīñāngā nē
māningā ingante bāi ongoncāte ante
togāngantapa. ¹⁴ Incāte Wāngonguī,
Ōnōmāca īñōmō bitō beyā botō
cāyōmō pao pao gocābiīmpa, ante
cādinque nāēnāngade guīngāmōwā
ōnonguēnepā bāi tipānguēnepāa pōnō
badongā enguēnepānte bāi onquiyāngā
bacantapa. Īnīnque onquiyāngā, Tāntā
botō īmote bāi ongōnāmaī incācāīmpa,
ante Wāngonguī ōnōmāca tōmēngā
beyā nānō cāyōmō pao pao gocantapa.
Mēa go adoque tācā wadepo īñonte
tōmēngā mānīñōmō quēwēnte beyā
nānō cānguī eyepā ānte cānguīñōmō
gocantapa. ¹⁵ Ayā, Onquiyāngā ingante
āpā quīngā mānguī bāi bāe ta tāēi
guīcācāīmpa, ante cādinque dadagōō
tōmēngā ōnōne īnō ōnō bāi āpā towā
tadonte bāi tao godecantapa. ¹⁶ Dadagōō
towā tadonte bāi nānō tao godepā
quīngā pōñō onguīpo incā onquiyāngā
beyā ante cādinque wī ānēte cāyō
ada guīpāntapa. ¹⁷ Ada guīpā adīnque
dadagōō īñōmō onquiyāngā ingante
godōmenque ānguī badīnque wādē
godīnque, Māningā onquiyāngā
wēnāni incā wādāni īnānite guēa
cāte wānonguīmo, ante gocantapa.
Tōmēnāni Wāngonguī nānō, Īmaī

cāedāni, ante wāē angāīnō ante nē
ēñēnte quēwēnāni inte, Itota ābānō
cācāā, ante nē āpānēte quēwēnāni
īnōnāni īñōmō mānīnāni māningā
onquiyāngā wēnāni īñōnānite dadagōō,
Wānoncāboīmpa, ante gocantapa.

Mēnaa mōnō guīñēnōna

13 ¹ Ayā dadagōō āpāntībā
yāwedeca ēmōnaiya īñōmō
ponte a ongongantapa.

Ayā babācā bāi nē guīñēnongā īñōmō
āpāntībādē quēwēnte ta pōñongā
atabopa. Mōnō guīñēnongā tōmēngā
ocabocoo ōnōmpo āmāmpoque
go mencaā encacā inte tōmēngā
ōnōmoncawā ōnōmpo tipāmpoga
ocabocoo ingā īnō encacā ingantapa.
Awēnē pogantacoo tipāmpoga ganca
tōmēngā ōnōmoncawāā da da wēncate
encācantapa. Ayā Wāngonguī ēmōwo
īncā wīwa babā wāpītīcā ante āniwoī
tōmēngā ocabocoo tōmāncōoga
īnō yewāmonte encacā ingantapa.

² Māningā mōnō guīñēnongā botō nē
adīngā īñōmō mēñe bāi ēmōnongā
īncāte tōmēngā ōnōwa oto ōnōwa bāi
ēwacā inte tōmēngā ōnōne nēōō ōnōne
bāi ēnecā atabopa. Ayā dadagōō nāmā
nānō tāēi pīñānō ante mōnō guīñēnongā
ingante pādā godōnīnque tōmēngā
nānō aacā tāē contāīmpa pādā godongā
ānte tāē contādīnque mōnō guīñōnongā
nē awēnē badīnque, Īmaī cāedāni, ante
nānguī angā bacantapa. ³ Ayā mōnō
guīñēnongā adoque ocaboga āmocate
wāncā cācā bāi īngāīngā īncāte gāmā
cācate ingantapa.

Tōmāmā quēwēnāni mōnō
guīñēnongā ingante adīnque ancaī
guīñēnīnque tōmānāni tōmēngā
mīñā godānitapa. ⁴ Dadagōō godō
cācā beyānque mōnō guīñēnongā
īñōmō awēnē badīnque dadagōō bāi
nē angā do bacā impa, ante adīnque
tōmānāni dadagōō ingante, Bitō
Awēnē Wāngonguī bāi īmīdō ānguēnē,
ante āpānedānitapa. Adobāi mōnō
guīñēnongā ingante, Bitō Awēnē
Wāngonguī bāi īmīdō ānguēnē, ante

apænedänitapa töö. Mäninö ante godömenque iimaï äninque, “Æcänö mönö guiñenongä bai ingä iñömö edæ dæ angampa. Æcänö tömengä ingante guëadö guëa cædinque tæi ëmonte gänä cæquiringää.”

⁵Dadagöö godö cæcä beyænque mönö guiñenongä iñömö nämanque pönente änewënongä badinque Wængongui ingantedö ante babæ wapiticæ ante änewëninque, Botö Wængongui bai imopa cæminii, änewëngantapa. Ayæ awënë badinque në angä badingä inte mönö guiñenongä iñömö coadenta i doo apäicäa mänimpoga iñonte, iimaï cæedäni, ante aacantapa. ⁶Ayæ tömengä mäniñedë Wængongui ingantedö ante wënæ wënæ babæ wapiticæ ante änewënongä inte Wængongui ëmöwo ante tömengä nänö quëwëñömö ante babæ wapiticæ ante änewëngantapa. Tömënanäi öönädë në quëwënanäi inänitedö ante adobaï babæ wapiticæ ante änewëngantapa. ⁷Tömengä Wængongui quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badinque tömënanäi inänite tæi ëmongä inte gänä cæcantapa. Ayæ dadagöö godö cæcä beyænque mönö guiñenongä iñömö waodäni nani cabo waodäni nani cabo incæ wacä awënë nani cabo wacä awënë nani cabo incæ wadö nani tedecabo wadö nani tedecabo incæ wabæca nani quëwencabo wabæca nani quëwencabo iñönänite tömengä tömänäni awënë badinque tömënanäi inänite, iimaï cæedäni, ante në angä bacantapa.

⁸Mänömaï beyæ tömämæ quëwënanäi iñömö tömengä ingante, Bitö Awënë Wængongui bai imidö anguënë, ante apænecædänimpa. Wængongui inguipoga nänö badöñedë, Botö Codotedo ingante do wänönäni wæncæcäimpa, ante do angacäimpa. Iingä Codotedo, Nani quëwenguinta, ante nänö yewæmongaintaa ædänidö ëmöwo yewæmönämaï inäni iñömö tömënanäique mönö guiñenongä ingante,

Bitö Awënë Wængongui bai imidö anguënë, ante apænecædänimpa.

⁹Në ëamonca imini inte ëñëedäni.

¹⁰“Æcämenque ingante ante apænedinque Wængongui, Ao bæi ongonte tee mönete bai cæedäni, angä ininque tömengä ingante do bæi ongonte tee mönecædänimpa. Æcämenque ingante ante apænedinque Wængongui, Ao yaëmenca wänöminäi wæncæcäimpa, angä ininque tömengä ingante do yaëmenca wänönäni wæncæcäimpa.”

Mänömaï beyæ minitö Wængongui quimäni iñömö wëntäye inämaï inte ee cæcæminimpa. Edæ tömengä ingante godömenque wede pönencæminimpa.

¹¹Ayæ ate wacä wabæcä bai në guiñenongä guiquënë onguipodë quëwente ta pöñongä atabopa. Codotedoidi önömoncawæ mëwäa nani ëmoncadö bai tömengä adobaï encacä ingantapa. Incæte tömengä dadagöö bai tedecantapa. ¹²Mönö guiñenongä tänocä pöningä nänö änö beyænque ayængä pöningä iñömö awënë badinque tänocä beyænque äninque, iimaï cæedäni, ante në aacä ingantapa. Tänäcä pöningä mönö guiñenongä ämocate beyæ në wæncæ cæcä incæ wæætë gämæ cæcadingä iñongante ayængä pöningä iñömö tömämæ quëwënanäi inänite angä ëñëninque tömänäni tänocä pöningä ingante, Bitö Awënë Wængongui bai imidö anguënë, ante apænedänitapa. ¹³Mäningä mönö guiñenongä ayængä pöningä, Mä pöni cæbo adinque ëñencædänimpa, ante cædinque badongampa. Ayæ godömenque mä pöni cæcä beyænque waodäni edonque pöni ayönäni öönädë inö incæ gonga inguipoga wææ adänitapa.

¹⁴Mönö guiñenongä tänocä pöningä nänö änö beyænque tömengä weca mä cædinque ayængä pöningä iñömö tömämæ quëwënanäi inänite oda cæte nani goquinö ante mäocä godänitapa. Edæ tömënanäi inänite

äninque, Mönö guññenongä yaëmenca guiiyömö wæætë gämæ cæcate në miingä quëwengä nänö ëmönö bai adobaï badöedäni, angä ëñente badonte concädänitapa. ¹⁵Mönö guññenongä ayängä pöningä iñömö eyepæ cædinque mönö guññenongä tänocä pöningä nänö ëmönö bai nänäi badöinca incæ, Tedecæcäimpa, ante cæcä ate mäninca incæ oo guëmangantapa. Tömënäni nänäi badöinca ante waodäni Baa äninque, Bitö Awënë Wængonguï bai imidö anguënë, ante apænedämaï inäni inänite mäninca incæ ä beyænque wænönäni wænänitapa.

¹⁶Ayæ awënëidi bai inäni incæ önönänique incæ mäincoo ëadäni incæ mäincoo ömæpodäni incæ wacä godonte æningä beyænque në cæte quëwënäni incæ nämanque cæte quëwënäni incæ mäninäni tömänäni inänite tömengä nänö änö beyænque önompo tömempo inö yewæmöinäni badänitapa. Wæætë önompo tömempo inö yewæmönämaï inäni inte tömënäni önönemö inö yewæmöinäni badänitapa. ¹⁷Tömengä nänö yewæmöi yewæmönämaï inäni guiquënë tömënäni mäincoo ædö cæte godonte ænguïnänii. Ædö cæte godonte ænäni weca gote tömënäni mäincoo inï godonte ænguïnänii. Ayæ mäninö ante yewæmöi iñömö mönö guññenongä tänocä pöningä ëmöwo impa. Wüi tömengä ëmöwo yewæmonte i bai tömengä ëmöwo ante beyæ, Æpodö i, ante yewæmonte impa.

¹⁸Mäninö ante ëñencæte ante nänäi ëñënö ante eyepæ encadäni inte ëñencädänimpa. Ocai në encacä ininque, Mönö guññenongä tänocä pöningä nänö, Æpodö i, ante ëñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

144.000 ganca inäni nänäi
ämotamini äinö

14

¹Ayæ botö ayömote Wængonguï Codotedo änanquidi iñömö Tiöno

nänäi anquidi mäninömö a ongongå atabopa. Tömengä weca waodäni tiento coadenta i coatodo müido ganca inäni inte Wængonguï Codotedo ëmöwo adobaï tömengä Mæmpo Wængonguï ëmöwo nänäi önönemö inö në yewæmöinäni inte a ongonnäni atabopa. ²Ayæ botö ëñëñömote öönædë inö tedepämo ante ñænæ tēñabo ante bai detæbo eyequei tē bai ëñëninque adobaï waodäni nänäi adapate nänäi ampoque inte tæiyæänäni ampyönäni ante bai tedepämo tē ëñentabopa. ³Tiento coadenta i coatodo müido ganca inäni iñömö mä äninque waa ämotamini ante änänitapa. Wængonguï nänö aacæ tæ containpa gäänë ämotamini äñönäni müinäni quëwënäni mëa go mëa ganca inäni në aadäni në Picænäni tönö ëñëñänitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte æmo beyænque quëwenguimüni, ante Wængonguï nänö në æninänique i ämotamini äinö ante ëñente ancädänimpa. Wadäni guiquënë ædö cæte ëñente anguïnänii.

⁴Iñäni iñömö Wængonguï ingante ante waëmö quëwencæmönimpa, ante cædinque, Onquiyängä, ante në towënämaï ingainäni inänipa. Ininque tömënäni Wængonguï Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimüni, ante tömënäni inänite ængacäimpa. Täno amiña bayedë tä pedinque munitö, Wængonguï qui baquimpa, ante müni cönöni bai mäninäni adobaï Wængonguï quinäni badinque Wængonguï Codotedo quinäni inänipa. ⁵Adodäni cöwë babæ änämaï inäni ininque wadäni ædö cæte tömënäni inänitedö ante, Babæ änänipa, ante anguïnänii. Tömënäni edæ cöwë wënæ wënæ cädämaï inänipa töö.

Wængonguï anquedoidi mënäa
go adocanque nänäi änö

⁶Ayæ Wængonguï anquedo wacä iñömö öönædë inö pö pao pao gocä

atabopa. Inguipoga në quëwëñäni inänite wabæca nani quëwencabo wabæca nani quëwencabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wacä awënë nani cabo wacä awënë nani cabo iñönänite anquedo tömänäni inänite Wængongui wantæpiyæ cöwë nänö watapæ apænedö ante ëñencädänimpa, ante apænecæte ante pongantapa. ⁷Mäningä Wængongui anquedo iñömö yedæ iïmai äninque, “Wængongui apænte nänö anguiönæ do iinque bayonte mäniönæ tömämini mini cægainö ante tömengä apænte ancæcäimpa. Iinque tömengä ingante guïñëninque ee aedäni. Adobaï tömengä ingante waa aedäni. Tömengä edæ öönädë incæ inguipoga incæ æpæntibæ incæ æpæ tayömö incæ tömää në badongaingä ingante minitö, Bitö Awënë Wængongui imidö anguënë, ante ædæ wæäninque watapæ apæneedäni. Mäninque ämopa,” angantapa.

⁸Mäningä Wængongui anquedo gocä ate wacä Wængongui anquedo ayängä pöninque iïmai angantapa. “Babidönia nani äñömö do wo ëwente batimpa. Babidönia nani waëmö quëwëñömö i incæte do wo ëwente ba aedäni. Mäniñömö në quëwëñäni wënæ wënæ cædinäni iñömö onquiyängä në towengä bai cædinque biinömæ bete quidi quidi dowäninque towencädänimpa, ante ti nämæ godonte bai cædänipa. Tömëñäni mänömai godö cædäni beyænque wabæca nani quëwencabo wabæca nani quëwencabo wæætë wënæ wënæ cædänitapa. Mäninque ämopa,” angantapa.

⁹⁻¹⁰Ayæ mäningä Wængongui anquedo gocä ate wacä Wængongui anquedo tömengä pöninque yedæ iïmai angantapa. “Mönö guïñënongä tänocä pöningä ingante æcänö, Bitö Awënë Wængongui bai imidö anguënë, ante apænecäa. Ayæ tömengä nänö ëmönö bai nani badöñinca gäänë ædæ wæäninque æcänö apænecäa. Wængongui tömëñäni inänite nangui

piincæcäimpa. Tömëñäni önonpo incæ öñönemö incæ mönö guïñënongä nänö yewämöi në yewämöinäni adinque Wængongui adobaï tömëñäni inänite nangui piincæcäimpa.” Äninque Wængongui anquedo godömenque apænecantapa. “Mäniñäni Wængongui biinömæ nänö piimæ becädänimpa. Mäniñænque äninque tömengä nänö piinte owætadë pe fiinængantapa. Mäniñænque në bete bai inäni iñömö nangui pöni wæwencädänimpa. Wængongui tæiyæ waëmö anquedoidi weca ayæ Wængongui Codotedo weca gonga bæcoyömö atopode nani öö wadö gonga bæcoyömö öö wayömö mäniñömö iinäni æmäwo gonte ba bai nangui wæwencädänimpa,” angantapa.

¹¹“Ayæ tömëñäni gonga bæcoyömö mäniñömö wæwëñönäni nani wæwëmämo tëemä bai cöwë æicöompa. Woyowotæ incæ itädë incæ mäniñäni edæ guëmänämai incädänimpa. Tömëñäni iñömö, Mönö guïñënongä tänocä pöningä weca ædæ wæäninque, Bitö Awënë Wængongui bai imidö anguënë, ante në apænedäni inänipa. Ayæ tömengä nänö ëmönö nani badöñinca gäänë ædæ wæäninque në apænedäni adobaï tömengä ëmowo nänö yewämöi në yewämöinäni inte mäniñäni tömänäni wantæpiyæ mänömai guëmänämai inte wæwencädänimpa. Mäninque ämopa,” angantapa.

¹²Mänömai beyæ minitö Wængongui quimäni iñömö tömengä nänö, iïmai cædäni, ante nänö wææ angainö ante ëñente cædömini inte ayæ Itota ingante godömenque wede pönemäni inte minitö wæntæye inämai inte ee cæcæminimpa.

¹³Ayæ ate botö öönädë inö tedepämo iïmai ante ëñentabopa. “Bitö iïmai yewämöe,” angantapa. “Nöwo ganca ayæ ate Awënë Itota ingante pöñente në wänäni inte tömëñäni nani toquinque.”

Ante äñongä Wængongui Tæiyæ Waëmö Öñowoca, “Ao ämopa, angampa. Nani toquinque ingæimpa. Tömëñäni nani nangui cægainö fiimpo cæte

guëmancädänimpa. Edæ tömënäni nāni waa cægainö öönädë iñömö edonque pöni acæimpa,” ante angantapa.

**Inguipoga quëwënäni beyæ
amiña bai bacæimpa**

¹⁴Ayæ botö ayömo näämænta boguimä mä owo atabopa. Adocanque Wacä ëñagaingä ingä bai iñömö mänii boguimäa tæ contacä atabopa. Tömengä ocaboga awënë poganta oodo inte badöinta encacä inte tömengä nänö önönempo yaëmë bai waingamë idämæ engamë næængä atabopa. ¹⁵Ayæ ate wacä anquedo Wængongui oncö tæiyæ waëmö oncönë ta pöninque boguimäa nê tæ contacä ingante iïmai yedæ ante aa pecantapa. “Inguipoga quëwënäni botö imote nê wede pönente waa cædönäni iñömö nê minte pæmö bai inäni inte tömënäni nāni to amiña bayedë bai impa. Wadæ wadæ pönöinque nāni ö æñedë bai do bayonte bitö yaëmë bai bitö nææi ænte gote mänināni inänite wadæ wadæ pönente bai cædinque ö æe.” ¹⁶Angä ëñëninque boguimäa nê tæ contacä gote inguipoga iñömö tömengä yaëmë bai nänö nææi inte wadæ wadæ pönente bai cædinque tömänäni nê minte pæmö bai inäni inänite ö ængantapa.

¹⁷Ayæ öönädë iñömö Wængongui oncö tæiyæ waëmö oncönë ongonte ta pöninque wacä anquedo adobai yaëmë bai waingamë idämæ engamë nææente pongantapa. ¹⁸Tömengä pongä ate Wængongui anquedo wacä pongantapa. Wængongui oncö tæiyæ waëmö oncönë, Wængongui quí, ante iya tæ, ante nê änongå inte nāni iya täimoga gäänë ongöninque ta pöninque yaëmë bai waingamë idämæ nê engamë næængä ingante iïmai yedæ apænecantapa. “Inguipoga tömäo nê wënæ wënæ cædäni iñömö yowecoo bai inänipa. Mänināni yowe ite bayedë bai inäni adinque bitö yaëmë bai bitö nææi ænte gote yowecoo wangö tadampote gæte bai cædinque tömënäni inänite cæe.”

¹⁹Angä ëñëninque Wængongui anquedo inguipoga iñömö tömengä

yaëmë bai nänö nææi inte wangö tadampote cædinque yowecoo gædäni bai tömengä nê wënæ wënæ cædäni inänite adobai cæcantapa. Ayæ yowepæ ante nænængade nāni pinä pinä gäwate cæincadedë yowecoo wææntodonte bai cædinque tömengä wënæ wënæ cædäni inänite Wængongui piinte nänö päiñömö wido cæcantapa. ²⁰Mänii tömënäni yowecoo ænte pinä pinä gäwate cæincade iñömö tömënäni nāni quëwëñömö yabæca ongompa. Mäniñömö tömënäni inänite pinä pinä gäwate bai cædänitapa. Cæyönäni tömënäni wepæ nangui pöni gotimpa. Cabayo goto winediñömö æi ganca tömënäni wepæ mäninganca æi godinque todee tiento quidömetodo ganca mäninganca nangui pöni wepæ gotimpa.

**Tiæte ganca nāni
wæwenguimämo pompa**

15 ¹Ayæ botö ayömete Wængongui nõwo wæætë mä pöni odömömo adinque ëñencädänimpa, ante cædinque öönädë inö bamönengæ pöni badongä a owo atabopa. Wængongui anquedoidi önompo æmæmpoque go mënaa inäni iñömö öönädë ongöñönänite tömënäni inänite, Minitö cæmïni beyænque waodäni nāni wæwenguimämocoo önompo æmæmpoque go mempoga pongæimpa, angä ëñente ænte pönänitapa. Mänii wæwëmämocoo æmæwo ba adinque Wængongui nänö ængui panguimämo eyepæ bapa.

²Ayæ æpæntibæ iñömö awocawænta ëmö bai adinque botö mänintibæ tönö gonga guëa wempodente bæco atabopa. Adotibæ yæwedeca waodäni mä ongönänipa. Mänināni iñömö mönö guñënongå ayæ pöningä ingante ante ayæ tömengä nänö ëmönö bai nāni badöninca ante Baa äninque tömënäni tæi ëmonte gänä cædäni inänitapa. Adodäni tömengä ëmöwo ante, Æpodö i, ante Baa ante yewæmönämai inäni atabopa. Wængongui tömënäni inänite adapate nāni ampoqui godongä ænte

näæante a ongönänipa. ³Töménäni a ongöninque Wængongui ingante nê cægaingä Möitee wodi ämotamini nänö angainö ante ayæ Wængongui Codotedo ämotamini nänö againö ante iïmai ämotamini änanipa.

“Awënë Wængongui bitö adobique Tömää Cægaïmi inte bitö mä cædö iñömö waëmö pöni inönö angüenë. Bitö tömämæ quëwënäni Tæiyæ Awënë Odeyebi imidö angüenë. Quïemë cædinque bitö nê nö cæbi imipa.

⁴Awënë ëñëmi, Æcämë bitö imite guïñënämaï inguingää. Ayæ bitö ëmowo ante pönente æcämë waa adämaï inguingää. Edæ bitö adobique tæiyæ waëmö imipa. Tömää bitö nö cædinö edonque pöni ba adinque wabæca wabæca nani quëwencabo tömänäni bitö weca ponte ædæ wææninqe bitö imi, Bitö Awënë Wængongui imidö angüenë, ante ancædänimpa.”

⁵Ayæ ate botö ayömote öönædë iñömö Wængongui tæiyæ waëmö oncö incæ æmontaicö bai inte tömengä nänö nänëñ owocö iñömö wi ænete bayö atabopa. ⁶Wængongui anquedoidi önompo æmæmpoque go mënaa inäni mänincönë ongonte ta pönänitapa. Töménäni cædäni ate waodäni nani wæwenguimämo iñömö önompo æmæmpoque go mempoga pongæimipa. Töménäni weocoo waëmoncoo nino nani ancoo ñäö bai ëmoncoo mongæänäni inänipa. Töménäni tæcætawë inö pacadeyænta oodo inte nani badöinta mongæënëmæinäni inänipa.

⁷Ayæ miïnäni quëwënäni mënaa go mënaa iñönäni adocanque Wængongui anquedoidi önompo æmæmpoque go mënaa inäni iñönänite owætacoo adotaque adotaque pædæ godongä ænänitapa. Mänintacoo önompo æmæmpoque go mentacoo iñömö oodo

inte nani badöintacoo inte Wængongui nê wantæpiyæ cöwë quëwengaingä ingä nänö ængui pämämo eyede ënentapa. ⁸Wængongui nänö ñäö apäidö beyæ ayæ tömengä nänö tæi pïñämämo beyæ tömengä tæiyæ waëmö oncönë iñömö tëëmämämo eyede më ongompa. Ayæ Wængongui anquedoidi önompo æmæmpoque go mënaa inäni cædäni ate waodäni nani wæwenguimämo ante önompo æmæmpoque go mempoga nani wæwenguinganca iinque baganca æcämenque incæ Wængongui tæiyæ waëmö oncönë guiddämaï incædänimpa.

Wængongui nänö ængui panguintacoo

16 ¹Ayæ ate Wængongui tæiyæ waëmö oncönë inö tedepämo yedæ tē ëñentabopa. Nê angä iñömö Wængongui anquedoidi önompo æmæmpoque go mënaa inäni inänite, “Goedäni, äninque, Wængongui owætacoo nänö ængui panguintacoo önompo æmæmpoque go mëna ganca incoo näæante gote inguipoga iñömö gao cædäni,” angä ëñentabopa.

²Wængongui anquedo tänocä godinque tömengä owætadë ënë incæ inguipoga gao cæcantapa. Gao cæcä ate mönö guïñënongå ayæ pöningä nänö yewæmöi nê yewæmöinäni inte tömengä nänö ëmöñö bai nani badöinca gäänë ædæ wææninqe apænedäni iñönänite tömënanäni ayaa nantai ñömæi tömäo baadinque nantate wædänitapa.

³Wængongui anquedo ayæ nê gocä tömengä owætadë ënë incæ æpæntibæ cæncadëmæ gao cæcä ate mänimæ iñömö do wænänäni wepæ bai bayonte mänintibædë quëwënäni tömänäni wænänitapa töö.

⁴Wængongui anquedo ayæ nê gocä tömengä owætadë ënë incæ æpænë tömänonga gao cædinque æpæ tayömö tömäñömö gao cæcä ate mänimæ tömämæ wepæ batimpa. ⁵Ayæ ate Wængongui anquedo æpæ tömämæ beyæ nê angä inte iïmai apæncä ëñentabopa.

“Mönö Tæiyæ Waëmö inömi ëñëmi, bitö wëñëñedë do nê

quëwengaïmi ïmi ñowobi adobi
ïnömi ïmipa.

Mänömaï tömënanï inänite apænte
ante päningue bitö nö cædinque
apænte pänimi ïmipa.

⁶ Edæ bitö quïnäni tönö bitö beyæ
në apænëgainäni inänite wænönäni
ate
tömënanï në wænäni wepæ näate
bagadänimpa.

Bitö wæætë në wænonte näate
badäni näni cægaï beyæ
wepæ godömi begadänimpa,”
angantapa.

⁷ Ayæ Wængongui quï, ante näni iya
täimoga ïnö tedepämo të ëñentabopa.
“Ao ämopa. Awënë Wængongui bitö
adobique Tömää Cægaïmi inte, ïmaï
pancæboimpa, ante bitö apænte
angainö bai cædinque tömënanï inänite
päningue bitö cöwë nö cæte waa
päimipa.”

⁸ Wængongui anquedo ayæ në gocä
tömengä owætadë ënë incæ nænque mäë
owoyömö mänïñömö gao cæcantapa.
Ayæ waodäni æmontaiya montæ gongate
wæcædänimpa, ante cædinque në godö
angä beyænque nænque nangui tï näwä
batimpa. ⁹ Mänïi nangui tï näwante beyæ
waodäni montæ gongate badäni incæte
tömënanï näni wënæ wënæ cædinö
ante, Ancaa wæwente awædö, ante ayæ
pönënamai inäni inte ñimpo cædämaï
inte Wængongui ingante waa adämaï
inänitapa. Tömënanï, Wængongui
cæcä beyænque mönö wæwëmämocoo
pönimpa, ante wædinque Wængongui
ingante piïningue tömengä ëmöwo ante
wënæ wënæ babæ ante tedewënanitapa.

¹⁰ Wængongui anquedo ayæ në gocä
tömengä owætadë ënë incæ mönö
guiñënongå tänocä pöningä nänö aacæ
täë contaimpaa gao cæcä ate tömengä
awënë odeye ïnogä inte nänö aayömö
mäë mämonte bai batimpa. Waodäni
nantate wædinque önonguëñëwa
æo pocænguëñëwate wædänitapa.

¹¹ Mänömaï wædäni incæte tömënanï
näni wënæ wënæ cædinö ante, Ancaa
wæwente awædö, ante godömenque

pönënamai inäni inte ñimpo cædämaï
inänitapa. Wæætë nantai baate nantate
wædinque Wængongui öönædë
quëwënongå ingante piïnte badinque
wënæ wënæ babæ ante tedewënanitapa.

¹² Wængongui anquedo ayæ në
gocä tömengä owætadë ënë incæ
ñænæ önonga Eopadatedö näni änonga
mäninonga gao cæcä ate awënë
odeyeidi nænque tamönö quëwente näni
ponguinö taadö ante önö tömäo amimö
batimpa.

¹³ Ayæ wënæidi wentamö näni
ëwocacabo mënaa go adocanque
inäni iñömö weque bai inäni ta
pönäni atabopa. Dadagöö önonë ïnö
adocanque wënæ ta pongantapa. Mönö
guiñënongå tänocä pöningä önonë
ïnö wacä wënæ ta pongantapa. Ayæ
Wængongui beyæ në apænëdömo ïmopa,
ante në babæ apænëdongä önonë ïnö
wacä wënæ pongantapa. ¹⁴ Mäninäni
wënæidi önöwocaidi inäni inte mä
cædäni inänipa. ïnänï iñömö tömämaë
awënë odeyeidi weca äñecæ godinque
tömënanï inänite apænëdinque, Awënë
Wængongui adocanque Tömää në
Cægaingä inte nänö apænte anguiönæ
iñonte minitö godongämæ ponte guëadö
guëa cæcæminimpa, ante cædänipa.

¹⁵ “Mönö Awënë nämä incæ ïmaï
angantapa. Aedäni. Në awëmö ængä
iñontobæ pongä bai botö adobai äñamaï
inte poncæboimpa. Äyedëno ponguingä,
ante në mönämaï ongongå iñömö
tömengä wänö cönongä bai ïnogä
inte nänö toquinque. Edæ tömengä,
Ömaabo inämaï incæboimpa, ante ayæ,
Guiñëñate wædämaï incæboimpa, ante
tömengä weocoo tömë weca ee mangä
ïnogä ingampa,” angantapa.

¹⁶ Mänïi wënæidi önöwocaidi tömämaë
awënë odeyeidi inänite äñecæ gote
änäni ëñëningue awënë odeyeidi iñömö
tömënanï tontadoidi tönö Adämaguedö
ebedeo tededö näni äñömö adoyömö
godongämæ pönänitapa.

¹⁷ Ayæ Wængongui anquedo tömengä
në gocä tömengä owætadë ënë incæ
woboyæ owoyömö mänïñömö gao

cæcä ate öönæde inö Wængongui tæiyæ waemö oncönë tömengä nänö aacæ tæ contayömö mäninömö tedepämo yedæ tedinque, “Nöwo iinque batimpa,” angantapa.

¹⁸ Ayæ ate yædæ yædæ näinimpa.

Detæbo tæi tæi tæ goyö yedæ pönï änimpa. Ayæ goinque nanguï pönï ocæ ocæ gotimpa. Waodäni inguipoga näni quëwenganca tömanganca mänii goinque bai wa goinque cöwë godämaï inimpa. ¹⁹ Goinque ocæ ocæ goyonte tömënanï näni ñænæ quëwëñömö incæ tænguimæ tænguimæ godinque mëñömonga go adoyömonque batimpa. Ayæ wabæca näni quëwencabo wabæca näni quëwencabo incæ tömäo näni quëwëñömö onconcoo acapowate bogocæ tæ gowæänimpa. Wængongui adobaï, Babidönia näni waemö quëwëñömö quëwënanï wënæ wënæ cædänipa, ante pönente wædinque ænguï badinque, Mini wæwenguinque impa, ante owæta biinömæ nänö piimæ eyede ënë godonte bai cædinque tömënanï inänite nanguï piinque pangantapa. ²⁰ Tömää wää tæiwænë inömö yogæ guitiimpa. Ayæ onquiyabocoo adobaï dæ bibitapæ batimpa. ²¹ Ayæ öönæde inö yoguica cöönæ bai waodäniya tæi tæi wæänimpa. Mäninca tæi tæi wæäninca adocaque incæ wodo tiëë diboda tee mä ganca enca impa. Yoguica wënæ wënæ incapa, ante adinque waodäni, Mäninca mönö wënæ wënæ wæwëmämo impa, äninque Wængongui ingante piinte badinque wënæ wënæ babæ ante tedewënanitapa.

Onquiyängä mäincoo beyæ në towente quëwënongå

17 ¹ Wængongui anquedoidi önonpo æmæmpoque go mëa ganca inäni önonpo æmæmpoque go mëa ganca owætacoo në næænäni inönänite adocanque botö weca ponte, “Pöe, angantapa. Onquiyängä mäincoo beyæ në towente quëwënongå inömö æpæncoo yædopäa në tæ contacä apænte

nänö panguinö ante botö odömömo acæbiimpa. ² Inguipoga awënë odeyeyidi incæ tömengä tönö towengadänimpa. Waodäni inguipoga quëwënanï incæ adobaï tömengä towëinënö beyæ tömengä biinömæ bete bai quidi quidi dowænte bai pönënamäi cægadänimpa,” ante apæncä ëñentabopa.

³ Wængongui Önöwoca incæ botonga pö guiyongä botö wiimonte bai iïmaï atabopa. Wængongui anquedo adocä inömö botö imote ö ænte mäo önömæca inömö cönongä ongantabopa. Mäninömö ongöinque botö onquiyängä babæcä bai në guinönongäa mongænte a ongongä atabopa.

Mäningä mönö guinönongä opatawæ ëñadongä inte ëmowocoo tömengä baonga godämæ tömengä yewämöi ëñacä ingantapa. Mäniwocoo Wængongui ingantedö ante wënæ wënæ babæ wapiticæ äniwocoo inönimpa. Mäningä mönö guinönongä nänö ocabocoo önonpo æmæmpoque go mëa encacä inte tömengä nänö önömoncawæncoo önonpo tipæmpoga ëmoncacä ingantapa. ⁴ Onquiyängä inömö tömengä weocoo awënëidi waëmoncoo näni mongæncoo tönö opatawæ ëmoncoo mongængantapa. Tömengä, Botö waemö incæboimpa, ante oodo badöincoo tönö dicamö näni nanguï godonte ænincoo tönö pededamö näni ämö mänimoncoo mongænte ingantapa. Tömengä önönempe owætadë oodo inte badöintadë quimæmë baapæ bai i eyede engapæ næængantapa. Mäningä onquiyängä quimë nänö wënæ wënæ cæpämö nänö towente quëwëno bai mänintadë næængantapa. ⁵ Adocä onquiyängä tömengä önönemö inö ëmowo yewämöi ëmongä ingantapa. Mäniwo wë wodonte bai i incæte iïmaï ante impa.

“Babidönia näni waemö quëwëñömö i incæte onquiyängä në towengä bai impa.

Waodäni në godö towënanï wäänä bai mäningä onquiyängä ingampa.

Ayæ adobaī inguipoga quēwēnāni
wīwa nāni cæinēnō ante nē
cædāni wāānā bai adocā
onquiyængā ingampa.”

Mānōmaī tōmengā ōnōnemō inō
yewæmonte emongantapa. ⁶Wængonguī
quīnāni ingaināni tōnō Itota ingante
ante apænedāni beyæ nē wængaināni
tōmēnāni wepæ bete bai māningā
onquiyængā quidi quidi dowænte bai
ingā botō atabopa. Tōmengā ingante
adinque botō ancai guiñente wætabopa.

⁷Ancai guiñente wæyōmote
Wængonguī anquedo botō imote
īmaī angantapa. “Quīnante ancai
guiñente wæbii. Mōnō guiñēñongā
īñōmō tōmengā ocabocoo ōnompō
æmæmpoque go mencaā encacā inte
tōmengā ōnōmoncawæncōo ōnompō
tipæmpoga emoncacā inongā inte
onquiyængā ingante nē mongængā
ingampa. Onquiyængā ingante nē
mongængā mōnō guiñēñongā tōnō
onquiyængā tōmēna nāna wē wodonte
īnī æbānō ī, ante apænebo ēñēe.

⁸Adocā mōnō guiñēñongā bitō adingā
īñōmō wēēnēñedē quēwengaingā
inte ñōwo dæ angā incæte ayæ ate
tadōmengadænguipodē inō ææ ta
poncæcāimpa. Ta pōninqe tōmengā
nānō æmæwo omæe ewenguinque
ingæimpa. Wængonguī, Quēwenguīnta,
ante inguipoga badōnāmaī īñedē nānō
yewæmongaintaā inguipoga quēwēnāni
tōmēnāni emōwo nē yewæmōnāmaī
īnāni īñōmō tōmēnāni īñōmō mōnō
guiñēñongā do quēwengaingā ñōwo
dæ angā incæte ayæ ate pongā adinque
ancai guiñente wæcædānimpā,” ante
Wængonguī anquedo apænecantapa.

⁹Ayæ tōmengā wæætē apænecantapa.
“Mānīnō ante ēñencæte ante ocai
ēñēnō nē encacā inte ēñencæcāimpa.
Mōnō guiñēñongā tōmengā ōnompō
æmæmpoque go mēa ocabocoo īñōmō
ōnompō æmæmpoque go mēa ānanquidi
bai īnānīpa. Mānīī ānanquidiboga
onquiyængā tæ contacā ingampa. Mānīī
ocabocoo adobaī ōnompō æmæmpoque
go mēa awēnē odeyeidi bai īnānīpa.

¹⁰Mānimpodāni īñōnānite ōnompō
æmæmpoque awēnē odeyeidi īnānite
wido cædānitapa. Adocanque awēnē
odeye īñōmō ñōwo aacā ingampa. Wacā
awēnē odeye ayæ pōnāmaī ingā incæte
tōmengā pōninqe wantæ īñō ongonde
aacæcāimpa. ¹¹Ōnompō æmæmpoque
go mēa ganca awēnē odeyeidi nāni
cabo īñōnānite mōnō guiñēñongā
adocā inongā incæte tōmēnāni beyæ
ponguingā ingampa. Tōmengā īñōmō
wēēnēñedē nē quēwengaingā incæ
ñōwo dæ angā inongā inte tōmengā
nānō æmæwo omæe ewenguinque
poncæcāimpa,” ante Wængonguī
anquedo apænecantapa.

¹²Ayæ tōmengā wæætē
apænecantapa. “Ayæ ōnompō tipæmpoga
ōnōmoncawæncōo bitō adimoncawæncōo
īñōmō ōnompō tipæmpoga awēnē
odeyeidi bai īnāni incæte ayæ aadāmaī
īnānīpa. Incæte ayæ ate tōmēnāni īnānite
ānāni ate awēnē odeyeidi badinque
tōmēnāni, īmaī cædāni, ante ānāni
bacædānimpā. Ayæ mōnō guiñēñongā
tōnō tōmēnāni adoque ooda ganca
godongāmæ aacædānimpā. ¹³Tōmēnāni
adodō ante pōnēnāni inte, Mōnō tæī
pīñænō ante guiñēñongā ingante godōmō
æncæcāimpa. Ayæ awēnē odeyeidi īnōmō
inte mōnō, īmaī cædāni, ante nē āmō
īmō bai mōnō tōmengā ingante āmō nē
angā bacæcāimpa.

¹⁴“Mānīnāni Wængonguī Codotedo
ingante guēadō guēa cæcædānimpā.
Incæte tōmengā īñōmō awēnēidi
tōmānāni Awēnē inongā ingampa. Ayæ
woadāni awēnē odeyeidi īñōnānite
tōmengā Tæiyæ Awēnē Odeye inongā
ingampa. Īninqe tōmengā tæī
emōnongā inte tōmēnāni īnānite gānā
cæcæcāimpa. Tōmengā, Botō mīñæ tee
empo goquīmīni, ante woadāni īnānite
aa pedinque apænte nānō nē ængaināni
inte tōmengā mīñæ cōwē ædæmō cæte
tee empo godāni īnānīpa. Mānīnāni
adobaī tōmengā tōnō godongāmæ
guēadō guēa cæte wænonguīnāni inte
tæī emonte gānā cæcædānimpā,” ante
Wængonguī anquedo apænecantapa.

¹⁵Ayæ tömengä wæætë botö imote iimaï apænecantapa. “Onquiyængä mäincoo beyæ towente quëwëngä inte æpæncoo yædopäa tæ contacä abitapa. Mänii æpæncoo iñömö tæiyænäni waodäni bai inänipa. Wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ waodäni tæiyænäni inänipa. Mäninäni tömänäni mänii æpæncoo bai inänipa. ¹⁶Ayæ önompo tipæmpoga önömoncawæncoo bai awënë odeyeidi tönö mönö guiñëngä iñömö tömënanäni bitö në adinäni inönäni inte onquiyængä mäincoo beyæ në towente quëwëngä ingante piincädänimpa. Piinque, Tömengä ingante æmæwo ömäe ewengæimpa, ante cæcädänimpa. Tömengä mäincoo tömancoo ö ænänäni ate ömaacä inte wæyongante tömengä baö cæninque tömengä ingante æmæwo iya tancädänimpa. ¹⁷Wængongui, Botö angai bai iinque baganca tömënanäni botö pönëno ante cæcädänimpa, ante godö cæcä beyænque mäninäni awënë odeyeidi näni mimönë adodö ante pönënanäni. Pönëninque tömënanäni godongämæ Ao äninque, Mönö guiñëngä aacæcäimpa, ante tömengä ingante, Mönö tæi piñænö ante godömö ænguingä, ante godönäni ængantapa.

¹⁸“Mäningä onquiyængä bitö adingä bai Babidönia näni waëmö quëwëñömö adobai impa. Mäniiñömö awënëidi iñömö tömämæ awënë odeyeidi inänite në aadäni inänipa,” ante Wængongui anquedo apænecantapa.

**Babidönia näni quëwëñömö
do wo ewente batimpa**

18 ¹Ayæ ate Wængongui anquedo wacä inte öönädë inö wææ pongä atabopa. Tömengä tæi piñængä inte nanguï angä ingä inte nämä nänö ñäö apäite emönö inte ingui-poga iñömö ñäö apäicä atabopa. ²Tömengä nänö tedepämo inte iimaï yedæ aa pedinque, “Babidönia näni äñömö do wo ewente batimpa. Babidönia näni waëmö quëwëñömö i incæte do wo ewente ba aedäni.

Badinque wënæidi näni owoyömo batimpa.

Wënæidi wentamö ewocadäni tömänäni mäniiñömö tee mönincönë bai quëwënanäni.

Ayamöidi baacäidi tömänäni adobai mäniiñömö wææ cæte bai owodänipa.

³Wabæca näni quëwencabo wabæca näni quëwencabo incæ tömänäni babidöniaidi wiwa näni towëinënö beyæ

tömënanäni biinömæ bete quidi quidi dowænte bai wädänipa.

Ingui-poga awënë odeyeidi incæ babidöniaidi tönö towënanäni.

Babidönia iñömö quëwënanäni nämanque ante pönente tocæte ante mäincoo nanguï pönäni ænte eadäni beyænque

ingui-poga në godonte ænänäni iñömö mäincoo nanguï pönäni eadäni badänipa,”

ante Wængongui anquedo aa pecantapa.

⁴Ayæ öönädë inö wacä tedepämo tedecä eñentabopa.

“Botö guidëmini eñeedäni. Minitö tömënanäni weca quëwëmini incæte, Tömënanäni tönö godongämæ wënæ wënæ cædämaï incæmönimpa, ante cædinque wadæ tao pödäni. Ayæ, Wængongui tömënanäni inänite päninque mönitö imönite pänämaï incæcäimpa, ante pönente wædinque wodii winonte pödäni.

⁵Tömënanäni wënæ wënæ cædimämo iñömö cabo ti gæte cönöninque bacoo pönäni ongompa.

Incæte Wængongui mäninäni näni wiwa cædimämo cöwë pönente wæcampa.

⁶Tömënanäni näni pönönäni bai minitö tömënanäni inänite adobai godoncæminimpa.

Tömënanäni näni pönö cædinö beyæ minitö wæætë adopo godö cædinque mem-poga ganca godömenque godö cæmini wæcädänimpa.

Ti nämæ godönäni bete bai
wädänitawo. Minitö wæætë
tömänäni owætadë ti nämæ
adopopæ pe ñiñænte wempo
cædëninque,
mempoga pe ñiñænte wempo
cædente bai cædinque
godömenque ti nämæ godömini
bete wæcædänimpa, angantapa.

⁷ Edæ tömänäni nämä incæ, Mönö
ñænämö imompa, ante pönente
nanguï waëmö mäincoo éate
quëwänäni iñönänite
minitö wæætë, Tömänäni ægancadó
waëmö quëwänäni, ante adinque
tömänäni inänite adoganca
piïnte cæmini nantate
wædinque tömänäni wæwente
quëwencædänimpa.

Mäninäni iñömö, 'Awënë odeye
nänöogängä bai contate
ongömompa. Edæ watapæ
quëwëmö imompa.

Wii owæmpoingä bai iñömö inte
wæwänämaï cöwë incämöimpa,⁷
ante önöwänenque pönente
änewänänipa.

⁸ Mänömainö ante në änäni inte
adoque itædë iñonte tömänäni
näni wæwëmämo iñontobæ pö ate
nanguï wæcædänimpa.

Mänionæ tömänäni näni
wænguimämo näni
wæwænguimämo näni gue
ænenquimämo pö wæcædänimpa
töo.

Tömänäni onconcoo gonga
bæcodocæimpa.

Edæ Wængonguï Awënë iñömö
Babidönia iñömö quëwänäni
inänite në apænte ante pangä
iñömö edæ tömengä tömää
cægaingä ingampa," ante
apæncantapa.

⁹ Inguipoga awënë odeyeidi incæ
Babidönia quëwänäni tönö towänäni
inte tömänäni adobaï Babidönia
quëwänäni tönö nanguï waëmö mäincoo
godongämæ ænte éate quëwänänipa.
Ininque Babidönia näni quëwëñömö

gonga bæcododique tæmancoo baca
baca æi adinque tömänäni wæwente
Ca ca wæcædänimpa. ¹⁰ Babidönia
iñömö quëwänäni nanguï pönäni
wæwänö adinque awënë odeyeidi ancai
guïñëninque, Mäninäni tönö godongämæ
wæwänämaï incämönimpa, ante
gomonga a ongöninque wæcædänimpa.

"Babidönia mini waëmö quëwëñömö
në quëwëmäni mini wæquinque
ingæimpa.

Mäniiñömö quëwëmäni mäincoo
nanguï éate inimiñi inte mini
wæquinque.

Wënæ wënæ cæmini iñöminite
adoque ooda iñonte Babidönia
mini quëwëñömö do apænte
pante wo ëwente batimpa." ante
wæcædänimpa.

¹¹ Inguipoga mäincoo ænte mante
në godonte ænäni iñömö, Edæ æcänö
mönö godonguënenco godonte
ænguinaa. Nöwo dæ ä, ante wæwente
Ca ca wæcædänimpa. ¹² Incoo iñömö
näni godonguënenco impa. Oodo
tönö padata, dica näni nanguï godonte
ænincacoo tönö pededamö näni
ämoncoo mä ongoncoopa. Adobaï
waëmoncoo nino näni ancoo tönö
awënëidi waëmoncoo näni mongæncoo
ayæ teda näni ancoo tönö opatawæ
incoo mä ongoncoopa. Quiwæmë oguï
wawænque i mäniwæ mä ongoncoopa.
Edepante бага inte näni badönincoo
tönö awænque näni nanguï godonte
æniwæ inte näni badönincoo mä
ongoncoopa. Yaëmenta bodonte
näni äniñi inte näni badönincoo tönö
iædo näni äniñi inte näni badönincoo
tönö mänömodo näni anca inte näni
badönincoo iñömö mänincoo tömancoo
mä ongoncoopa, ante wæcædänimpa.

¹³ Cänäda näni antapo tönö oguï waa
öni pæcaqui, oguï waqui näni iya täimö
tönö ti nä öni pæqui ayæ oguï wapæ öni
pæquimæ, biinömæ tönö oginguipæ,
waëmö ædina tönö todigomö mänincoo
mä ongoncoopa. Cæningäidi tönö
obegaidi cabayoidi tönö cabayo inte
ñä cæte näni wëä godö awotocoo

mæ ongoncoopa. Mänincoo tömancoo mæ ongoncoopa, ante wæcædänimpa. Ayæ adobaï, Waodäni incæ nê cæte quëwencædänimpa, ante cæningäidi bai godonguënemö intamompa, ante wæcædänimpa. ¹⁴Mäninäni Babidönia quëwënäni inänite iïmaï ancædänimpa.

“Quincamë ante beïnente wæmïni incæ mäninca tömanca mïnitö weca ñöwo dæ ancapa.

Mïni ëadïncoo tönö quïnö waëmö mïni mäincoo iïñömö mänincoo tömancoo ñöwo dæ ä iïnque mïnitö

ömæpomïni inte cöwë wæætë ænämäi incæmïnimpa,” ante ancædänimpa.

¹⁵Tömënäni mänïñömö quëwënäni inänite mänincoo näni godönincoo beyæ nê æninäni inte nê nanguï ëadïnäni incæ Babidönia iïñömö quëwënäni näni wæwënö adïnque, Mäninäni tönö godongämæ wæwënämäi incæmönimpa, ante gomonga a ongöninque ancaï guïñencædänimpa. Ayæ wæwente Ca ca wæcædänimpa. ¹⁶Ayæ iïmaï yedæ ancædänimpa.

“Babidönia mïni waëmö quëwëñömö nê quëwëmïni incæ mïni wæquinque ingæimpa.

Edæ mänïñömö quëwëmïni tömëmïni weocoo waëmoncoo nïno näni ancoo tönö awënëidi waëmoncoo näni mongæncoo tönö opatawæncoo mänincooque mongæmïni imïnitapa.

Mïnitö, Mönö waëmö incæmöimpa, ante oodo inte badöincoo tönö dicamö näni nanguï godonte ænincoo tönö pededamö näni ämö mänimoncoo mongæmïni imïnitapa.

¹⁷Incæte adoque ooda iïñonte mänincoo mïni ëadïncoo incæ edæ æmæwo ömæ ëwente batimpa, ante nê ænte godönäni edæ wæcædänimpa,” ante angantapa.

Æpæntibædo wipocoo nê töö töö cædönäni tönö, Wipodë nê godäni,

wipodë nê cædönäni tönö, Wipo inte mäincoo godonte ængæimpa, ante nê mäo godäni tömänäni mäninäni gomonga a ongoncædänimpa.

¹⁸Babidönia näni quëwëñömö gonga bæcododïnque tëëmancoo baca baca æi adïnque iïmaï yedæ ancædänimpa, “Iï Babidönia näni waëmö quëwëñömö bai wayömö näni waëmö quëwëñömö edæ dæ ampa, ante wæcædänimpa,” ante angantapa. ¹⁹Nê wæwënäni inte näni cæï bai onguipo guidimö ænte ocaboga wo ææntodonte wææ guicadïnque Ca ca wædinque iïmaï yedæ ancædänimpa,

“Babidönia näni waëmö quëwëñömö nê quëwënäni näni wæquinque ingæimpa.

Mänïñömö æpæntibædo wipocoo nê ëadäni inte

tömënäni näni godönincoo mänïñömö quëwënäni inänite godonte æninque tömänäni nanguï ëadäni badänitapa.

Ayæ adoque ooda iïñonte Babidönia näni quëwëñömö tömäo æmæwo ömæ ëwente batimpa, ante ancædänimpa,” angantapa.

²⁰Mäninö ante änäni ate, Tömämïni öönædë iïñömö quëwëmïni mänïñömö wo ëwente i adïnque watapæ tocæmïnimpa.

Wængonguï quimïni adobaï Itota nänö nê da godongaimïni tönö Wængonguï beyæ nê apænemïni tönö mïnitö tömämïni mänïñömö wo ëwente i adïnque watapæ tocæmïnimpa.

Edæ, Mïnitö imïnite æbanö wënæ wënæ cædänii, ante adïnque Wængonguï tömënäni näni quëwëñömö quëwënäni inänite apænte æninque pangä ate tocæmïnimpa, ante angantapa.

²¹Ayæ Wængonguï anquedo nê tæï ëmongä iïñömö dicabo näni mö mö equinca bai ñænængade dicabo æninque æpæntibæ cæncædëmæ wo guïitodöninque iïmaï angantapa.

“Mäninca æpæntibæ cæncædëmæ tæï wo guïitodömo guïi bai

Babidönia nani waemö quewëñömö wo ewente dæ ba ate cöwë adämaï incädänimpa.

²² Ìninque, Adapate nani ampogainö incæ ämotamini nani angainö incæ ööña bai nani we we öongainö incæ todompeta nani ancadeca nani we we öongainö incæ mäniñömö cöwë ëñënamäi ingäimpa.

Quiëmë badönäni incæ në badongainäni mäniñömö cöwë dæ ancädänimpa.

Tömënäni nani dicabo mö mö equinca inte cayönäni dicabo dadı dadı cayedë ä bai mäniñömö cöwë wıi ëñenguinänidö angüënë.

²³ Do nani ti wodönoincade mäniñömö cöwë tica ëñënamäi ingäimpa.

Onquiyängä ingante në monguingä mäniñömö cöwë dæ ä mönämäi inguinänidö angüënë.

Mäniñömö mäincoo ænte mante në godonte ænäni iñömö inguipoga ñænænäni inte ongongadänimpa.

Ayæ idöidi yewante bai cædinque mäniñömö quewëñäni, Waemö mäincoo, ante wapiticä änewëñäni beyænque wabæca nani quewencabo wabæca nani quewencabo incæ tömänäni nani quewencabo oda cæte gogadänimpa,” angantapa.

²⁴ Wængongui beyæ në apænegainäni inänite wänöningue mäniñömö quewëñäni incæ Wængongui quinäni inänite godömenque wänönäni wængadänimpa. Edæ inguipoga wänönäni në wængainäni tömänäni mäniñömö wänönäni wænte bai ingadänimpa.

19 ¹ Babidönia wo ewente ba ate öönädë iñömö waodäni täiyænäni adotedä ogä tededäni bai ëñentabopa.

“Mönö Awënë ingante watapæ apænecäimpa, ante, Adedoya, äningue,

Mönö Wængongui mönö imonte, Quewencæminimpa, ante në Ängä inongä ingampa.

Tömengä ñäö ëmongä inongä ingampa. Ayæ tömengä täi piñängä inongä ingampa.

² Edæ, Wængongui, İimai pancæboimpa, ante nänö apænte angainö bai cædinque tömengä cöwë nö cæte waa pangampa.

Babidönia iñömö onquiyängä mäincoo beyæ në towente quewëñongä bai impa. Mäniñömö quewëñäni në wiwa cädäni beyænque

inguipoga quewëñäni wæætë në wiwa cädäni badäni adinque Wængongui mäniñömö quewëñäni inänite apænte ante pangantapa.

Wængongui ingante në cædinäni inänite adodäni wänönäni adinque tömengä wæætë tömënäni inänite wänongä wänänitapa,” ante änänitapa.

³ Ayæ wæætë ogä tededinque, “Adedoya,” änänipa.

“Mäniñömö tēemancoo cöwë baca baca æicöompa,” ante änänitapa.

⁴ Mäniñedë Wængongui nänö tæ contaimpaa tæ contayongante në aadäni në Picænäni bæinticoatodo ganca inäni tönö miñäni quewëñäni mënaa go mënaa inäni iñömö ædæ wæäninque, Bitö Wængongui Awënë imidö angüënë, äningue “Amëë, Adedoya,” ante aa pedänitapa. ⁵ Wængongui nänö tæ contaimpa inö tedepämo iimai tededinque,

“Wængongui ingante në cæmini inte tömengä ingante në guñente ëñente cæmini iñömö

në awëñeidi imini incæ önöminique incæ minitö tömämini,

Mönö Wængongui ingante watapæ apænecäimpa, ante apænëedäni,” angantapa.

**Wængongui Codotedo
monguingä äämäë**

⁶ Ayæ adobai waodäni täiyænäni adotedä ogä tededäni bai ëñentabopa. Nænæ tēñabo ä bai detæbo eyequei tē bai ëñentabopa.

“Adeoya,
Mönö Wængongui Awënë Tömää në
Cægäimi inte

bitö në Awënë badinque aabipa.

⁷ Mönö watapæ pönī entawëninque
waa tocäimpa.

Edæ tömengä ingante apænedinque
mönö, Bitö ñäö emömi imipa,
ante angäimpa.

Edæ Wængongui Codotedo nänö
monguinö oo bacæ cæpa
cæminii.

Onquiyængä tömengä ingante
monguingä iñömö, Botö
nänöogængä inguingä oo
poncæcäimpa, ante nämä incæ
eyepæ cæte a ongongampa.

⁸ Tömengä ingante weocoo nīno nāni
ancoo waëmö näämæntacoo
nänö wëñaquincoo, ante pönönāni
ængä ingampa.

Wængongui quīnāni nāni nō
cægaincoo incæ
nīno nāni ancoo waëmö
näämæntacoo bai impa.”

⁹ Ayæ Wængongui anquedo botö
imote angantapa. “Īimai ante yewæmoe.
“Wængongui Codotedo monguingä ææmæ
pö becædänimpa, ante wente ængä në
ponguināni nāni toquinque.” Tömengä
ayæ godömenque äninque, “Mäninö
Wængongui nänö nō angainö impa,”
ante angantapa.

¹⁰ Ante äñongä botö tömengä önöwa
inö ædæ wæäninque tömengä ingante
watapæ apæneçæte ante cæyömote
tömengä wæætë, “Mänömai cædämai
imäwe, angantapa. Botö önönque
bitö bai Wængongui ingante në cæbo
imopa. Edæ bitö tönīñadāni Itota nänö
apænegaïnö në ëñente cædāni bai botö
adobaĭ Wængongui ingante në cæbo
imopa cæbii. Edæ Wængonguinque
ingante ædæ wæäninque, Bitö
Wængongui Awënë imidö anguënë, ante
apænee,” ante angantapa.

Itota godö odömongä beyænque
Wængongui beyæ në apænedāni
iñömö tömengä nänö apænegaïnö ante
ëwocadinque apænedänipa.

Näamænta cabayoga në tæ contacä mongænte pongampa

¹¹ Botö ayæ ayömote öönæde wi
ænete bai bayö cabayo näamænta
ëñacä a ongongä atabopa. Cabayo në
tæ contacä mongænte pongä iñongante,
Tömengä cöwë pönëninque në Ædæmö
Cædongä inte, Näwangä impa, ante në
Apænegaingä ingampa, ante pemonte
ingampa. Wënæ wënæ cædāni inänite
tömengä nō apænte ante pänongä
ingampa. Ayæ guëadö guëa cædinque
tömengä në nō cædongä ingampa.
¹² Tömengä awinca gonga bæcodote
bai ëmongä inte tömengä ocaboga
pogantacoo encacä ingampa. Tömengäa
ëmöwo yewæmonte ĩi incæte mäniwo
tömenganque nänö ëñëwo impa. Wadāni
ædö cæte ëñinguināni. ¹³ Tömengä
weocoo yacoo wepænë guipænente
mongængampa. Tömengä ëmöwo
iñömö, Wængongui nänö Angainö, ante
pemonte ingampa.

¹⁴ Öönæde iñömö tontadoidi tömengä
mīñæ tee empote godänipa. Tömënanī
nīno nāni ancoo waëmö näämæntacoo
mongæninque cabayoidi näamænta
ëñadāni yabæ tæ contate mongænte
godänipa. ¹⁵ Cabayoga në tæ contacä
iñömö wabæca nāni quëwencabo
wabæca nāni quëwencabo incæ waodāni
inänite yaëmenca pancæte ante äninque
tömengä önönë inö yaëmë tipængaa
waingamë engamë ënedinque yædæ
tadete ongongantapa. Tömengä iñömö
në tæiyæ awënë tömengä nempo
quëwënāni inänite aacä bai adobaĭ
tömämæ quëwënāni inänite, Īimai
cæedāni, ante aacæcäimpa. Yowepæ
ante yowecoo nāni pinä pinä gäwate
cæincadedë pinä pinä gäwate bai
cædinque cabayoga në tæ contacä
Wængongui ængui nänö angainö
beyænque iñömö tömënanī inänite
pīinte pancæcäimpa. Wængongui
adocanque Tömää në Cægäingä ingampa.
¹⁶ Cabayoga në tæ contacä iñömö weocoo
yacooga adobaĭ tömengä önontiya ĩi
ëmöwo yewæmonte ëñacampa. “Ayæ

waodäni awënë odeyeidi iñönänite tömengä Tæiyä Awënë Odeye Inongä ingampa. Tömengä iñömö awënëidi tömänäni Awënë inongä ingampa,” ante pemonte ingampa.

¹⁷Ayæ wacä Wængongui anquedo nænque cæncadëmö inö a ongongä atabopa. Tömengä öönädë gämänö në cæwodäni tömänäni inänite yedæ ante aa pedingue, “Adoyömö godongämä pöedäni. Edæ Wængongui tæiyä æämä ante pö cæedäni. ¹⁸Awënë odeyeidi incæ tontado capitäöidi incæ onguinänäni tæi piñänäni incæ cabayoidi incæ cabayocooga inte në tæ contate godäni incæ iñänäni tömänäni wänäni ate tömännäni baö cæncæte ante pöedäni. Waodäni awënë beyænque në cæte quëwänäni incæ në nämä cæte quëwänäni incæ awënëidi incæ önönänique incæ tömänäni baö pö cæedäni,” ante aa pecantapa.

¹⁹Ayæ botö ayömö mönö guinönongä tönö inguipoga awënë odeyeidi tönö tömännäni tontadoidi tönö adoyömö godongämä pöningue, Cabayoga në tæ contacä ingante ayæ tömengä tontadoidi inänite mönö guëadö guëa cæcäimpa, ante cædäni atabopa. ²⁰Incæte guëadö guëa cæyönänite tömännäni näëmä mönö guinönongä ingante bæi ongöninque, Wængongui beyæ në apænæbo, ante në babæ äningä ingante adobaï bæi ongönänitapa. Në babæ ängongä iñömö mönö guinönongä beyænque mä pönï cæcä inongäimpa. Iñinque mönö guinönongä tömengä nänö yewæmöi në yewæmöinäni iñömö tömengä nänö emönö bai nänäni badöinca gäänë ædæ wæænningue në apænedäni inte tömännäni në babæ ängongä nänö mä cædö adinque guinente wædinque oda cædönänipa. Iñinque mönö guinönongä tönö në babæ ängongä ayæ miina quëwëñonate atopode nänäni änantibæ gonga bai nänäni bæcodotibæ cæncadëmä wido cædänitapa. ²¹Tömenä miñæ pönäni inänite guiquënë cabayoga në tæ contacä tömengä önönë inö yaëmenca yædæ tadete ongöninque do wængongä

wänänitapa. Iñinque në cæwodäni baö ade cænänique tömänäni në wänänäni baö tömö pönï cæwëñonäni inänitapa.

Miido wadepo iñonte æbänö baquii

20 ¹Wængongui anquedo wacä iñömö tadömengadænguipo ontatodemö wi ænequï tönö ñänömencaimë ñänæmë önönempo næængä inte öönädë inö ta wæængä atabopa. ²Ta wæænningue tömengä dadagöö ingante bæi ongöninque tömengä nänö miido wadepo ganca ñä cæyænte ongonguinque ante ñä cæyængantapa. Mäningä dadagöö wëenënedë tantæ në ingaingä inte wænæ awënë Tatäna ingacäimpa. ³Mäningä ingante ñä cæyænningue tadömengadænguipodë wido cædinque ontatodemö wi ænequï inte tee mönedinque tömengä dæca ontatodemö ædæmö tee moncäcantapa. Waodäni wabæca nänäni quëwencabo ayæ wabæca nänäni quëwencabo iñönänite tömengä, Oda cæte gocædänimpa, ante miido wadepo ganca cædämaï incæcäimpa, ante Wængongui anquedo dadagöö ingante wido cæcantapa. Mänimpodepo iñinque ba ate tömengä ingante, Wantæ iñö ñimpo cæte goquingä, ante ñimpo cæcä gocæcäimpa.

⁴Ayæ awënëidi tæ contaimpacoo botö atabopa. Wængongui Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængongui nänö angainö ante apænedäni beyænque tömännäni inänite wangö tamencadäni wængadänimpa. Wangö tamencadäni wængainäni nänäni önöwocaidi botö ñöwo atabopa. Mäninäni iñömö mönö guinönongä ayæ pöningä ingante adinque, Bitö Wængongui Awënë bai imidö angüënë, ante apænedämaï inte ayæ tömengä nänö emönö bai nänäni badöinca gäänë ædæ wæænte apænedämaï ingadänimpa. Ayæ tömännäni nänäni önönemö inö nänäni önompö inö mönö guinönongä ayæ

pöningä nänö yewämöi yewämönämaï ingadänimpa. Adodäni ñäni ömämöninque adoque miido wadepo ganca Itota Codito tönö godongämæ aadänitapa.

⁵Mäninäni täno ñäni ömämönäni incæte wadäni guiquënë nê wængainäni incæ miido wadepo iinque go ate ñäni ömæmoncädänimpa. ⁶Täno ñäni ömämönäni iñömö nê tæiyæ waemö inäni inte nani toquinque. Edæ wadäni nê wængainäni mempoga ganca nani wænguimämo iñonte mäninäni iñömö wänämaï incädänimpa. Wæætë, Wængongui quï, ante nê godönäni bai tömënäni adobaï, Wængongui beyæ, ante ayæ, Itota Codito beyæ, ante cæcädänimpa. Ayæ miido wadepo iñonte Itota Codito tönö godongämæ aacädänimpa.

**Tatäna nänö æmæwo ömæe
ëwenguinö ante**

⁷Tadömengadænguipodë tömengä nänö tee mönecönë ñä cæyænte quëwëhongä iñongante Tatäna ingante miido wadepo iinque go ate ñi cæyænäni ta gocæcäimpa. ⁸Ta godinque tömengä inguipoga æmatæ go æmatæ go godinque Gogobæ nani ämæ ganca go Mäogobæ nani ämæ ganca gocæcäimpa. Inguipoga tömäo godinque tömengä, Wabæca nani quëwencabo ayæ wabæca nani quëwencabo nani oda cæte goquimämo ante cædinque tömënäni inänite, Mönö guëadö guëa cædinque gocæimpa, ante, Adoyömö godongämæ pödäni, ante ancæcäimpa. Æpodänidö inänii, ante tömënäni æpæ wedeca emönai bai tæiyænäni inguinänidö anguënë.

⁹Mäninäni bogænæ tömäo godäni bai tömënäni adobaï inguipoga tömäo gocädänimpa. Wængongui nänö waadete quëwëñömö tömengä quinäni quëwëñömö godämæ gocädänimpa. Goyönäni öönædë inö gonga bæcodote gao wææñonte gonte wæncädänimpa. ¹⁰Ayæ wænæ tömënäni inänite, Oda cæte gocädänimpa, ante nê cægaingä ingante

Wængongui bæi ongonte atopode nani änontibæ gonga bai nani bæcodotibæ cæncädëmæ wido cæcæcäimpa. Edæ mönö guïñenongä tönö, Wængongui beyæ nê apænebo, ante nê babæ äningä tönö tömëna dobæ mäniñömö wido cæte ingadäimpa. Iinque mäninäni itædë woyowotæ mäniñömö quëwente cöwë wantæpiyæ nani wænguimämo ingäimpa.

**Wængongui Awënë tæ
contaimpa näämæntapa**

¹¹Ayæ awënë tæ contaimpa ñænæmpa näämæntapa adinque botö mänimpaa nê tæ contacä ingä adobaï atabopa. Inguipoga tönö öönæ iñömö tömengä ingante ate bai cædinque wodii godinque nana ongöñömö edæ ædöme gote dæ änimpa.

¹²Ayæ nê wængainäni tömänäni awënëidi incæ önönäni incæ mänimpa gäänë a ongönäni atabopa. A ongöñönäni mincayontacoo wataa wataa wi æmpote ongoncoo. Ayæ mincayonta wataa Wængongui, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Nê wængainäni tömänäni æbänö cægainäni inänii, ante Wængongui mänintacoo nänö yewæmongainö ante wataa wataa tömanta adinque nê wængainäni nani cægai ganca, ante tömënäni inänite adoganca apænte ante pangantapa. ¹³Ayæ æpæntibæ cæncädëmæ do wængainäni wæætë ta pönänitapa. Æmæwo wængainäni incæ ta pönänitapa. Tömënäni nani wænte ongöñömö nê ongongainäni inte wadæ ta pönänitapa. Ta pönäni ate, Æbänö cægainäni inänii, ante adinque Wængongui adocanque adocanque nänö cægai ganca, ante tömengä ingante adoganca apænte ante pangantapa.

¹⁴Mäniñedë ganca ayæ baganca wänämaï quëwæncädänimpa, ante ayæ, Wængainäni nani ongöñömö adobaï dæ bacäimpa, ante cædinque mönö Awënë wængainäni æmæwo nani wængaimämo

tōnō nāni wænte ongōñōmō æpæntibæ gonga bai nāni bæcodotibæ cæncadēmæ wido cæcantapa. Mānintibæ mempoga ganca æmæwo nāni wænguimāmo bai impa. ¹⁵Wængongi, Quēwunginta, ante nānō yewæmongaintaa adinque, Æcānō ãmōwo mānintaa yewæmōnāmai ī, ante adinque nē yewæmōnāmai ingaināni inānite mānintibæ cæncadēmæ wido cæcantapa.

Inguipoga miinguipo oōnæ miīōnæ

21 ¹Ayæ oōnæ miīōnæ inguipoga miinguipo atabopa. Edæ oōnæ picæōnæ inguipoga picænguipo dæ iinque batimpa. Ayæ æpæntibæ adobaī dæ ānimpā. ²Ayæ godōmenque botō ayōmote Wængongi nānō tæiyæ wæmō quēwēñōmō miī Eedotadēē nāni āñōmō oōnædē inō ta wææ atabopa. Onquiyængā nē moncæ cæcā iñōmō, Botō nānōogængā inguingā waa acæcāimpā, ante wæmō weocoo nē mongængā bai īī quēwēñōmō adobaī wæmō pōni ãmō inte ta wææ atabopa.

³Ayæ Awēnē tæ contaimpā inō tedepāmo yedæ ä ēñentabopa. “Nōwo Wængongi nānō owoquincō waodāni weca ongō iinque tōmengā tōmēnāni tōnō quēwenguingā ingampa. Tōmēnāni tōmengā guidēnāni bacædānimpā. Ayæ Wængongi incæ, Botō tōmēmo minitō Wængongiimo incæboimpā, ante tōmēnāni weca ongoncæcāimpā. ⁴Tōmēnāni wēñapæ tamonte wædī tōmāmæ Wængongi wadæ cæmoncæcāimpā. Māniñedē æmæwo mōnō wænīmāmo incæ mōnō wæwēnimāmo incæ Ca ca mōnō wædīmāmo incæ nantate mōnō wædīmāmo incæ tōmāā mānimāmo dæ angæimpā. Edæ wēēnēñedē inīmāmo incæ iinque batimpa,” angantapa.

⁵Ayæ Awēnē tæ contaimpā nē tæ contacā iīmai angantapa. “Tōmāā inīmāmo botō ñōwo miī cæcæboimpā,” angantapa. Ayæ, “Mānōmaiñō ante botō āñinō edæ nō pōni īī iinque māninō ante wede pōngæimpā. Mānōmai beyæ bitō iīmai ante yewæmōe,” angantapa.

⁶Ayæ tōmengā wæætē botō imote iīmai āninquē, “Dobæ iinque batimpa. Botō Tānobo ingāimo inte Tōmāmo inguimo imopa. Wēēnēñedē tōmāā nē Badongāimo inte tōmāā nē Iinque Cæbo incæboimpā. Edæ nē gæwænāni, Æpæ beinēmōnīpa, ante nē ānāni inānite botō æpæ tapæ quēwenguiimæ oñonque godōmo becædānimpā. ⁷Tæī ãmōnte nē gānā cædāni inānite botō mānincoo botō nē godonguincoo godōmo æncædānimpā. Ayæ botō incæ tōmēnāni Wængongiimo incæboimpā. Tōmēnāni wæætē botō wēñænāni bacædānimpā. ⁸Wæætē guīñente awædō, ante nē ānāni tōnō nē pōnēnāmai ināni guiquēnē, nē wīwa cædāni tōnō wacā ingante nē wænōnāni guiquēnē, nē towente quēwēnāni tōnō idōidi nē ināni guiquēnē, Wængongi impā, ante nāni badōnīncā gāānē ædæ wæænīnque nē apānedāni tōnō nē babæ ānāni tōmānāni guiquēnē, mānināni iñōnānite atopode nāni ānontibæ gonga bai nāni bæcodotibæ incæ tōmēnāni nāni wæcōñōmō bacæimpā. Māniī nāni wænguimāmo iñōmō mempoga ganca nāni æmæwo wænguimāmo impā,” angantapa.

Miī Eedotadēē quēwēñōmō

⁹Wængongi anquedoidi oñompo æmæmpoque go mēa ganca ināni oñompo æmæmpoque go mēa ganca owætacoo waodāni iinque nāni wæwenguiimāmocoo eyedē engate intacoo nē næænāni iñōnānite adocanque botō weca pōnīnque, “Pōe,” angantapa. “Wængongi Codotedo nānōogængā nē baquingā nē monguingā iñongante botō bitō imite odōmōmo acæbiimpā,” angantapa. ¹⁰Ayæ Wængongi Ōnōwoca incæ botō imote bæi ongonte bai cæyongante botō wīimonte bai iīmai atabopa. Wængongi anquedo botō imote ò ænte māo onquiyaboga tæcædæca pōni cōngā ongonte ayōmo Wængongi tæiyæ wæmō nānō quēwēñōmō Eedotadēē nāni āñōmō oōnædē inō ta wææñonte tōmengā botō imote odōmongā atabopa.

¹¹ Mänii quëwëñömö Wængongui ñäö ëmönongä bai apäitimpa. Ayä dica aatapeca nani anca ëmö bai awocawænta bai waëmonca inimpa. Waodäni nani nanguï godonte äninca bai ñäö apäite bai Eedotadëë inimpa. ¹² Mänii quëwëñömö godämä tæimö wææ cædi äñowæmö ongönimpa. Ayä wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mëa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mëa ganca ongönänitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go mencabodäniya iñönänite tömënäni ëmowocoo yewæmonte inimpa. Wayömö odemonga adocaboque ëmowo wayömö odemonga adocaboque tamönö inö mëa go adoque odemö inimpa. Nænque wæidö inö mëa go adoque odemö inimpa. Betamonca inö mëa go adoque odemö inimpa. Adobaï ämatä inö mëa go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængongui Codotedo nänö da godongainäni önompo tipæmpoga go mënaa inäni tömënäni ëmowo incæ adocanque ëmowo wacaa adocanque ëmowo wacaa yewæmonte ëñacaimpa. ¹⁵ Wængongui anquedo botö imote në apænedingä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobaï tee mancæte ante mänii wææ cædi adobaï tee mancæte ante tömengä tee manguimpa næængantapa. ¹⁶ Mänii quëwëñömö ämatä adoganca ämatä

adoganca mænonte inimpa. Doyä inö betamonca inö adoganca inimpa. Tömengä mänii quëwëñömö tee manguimpa inte tee mante doyä inö äñowæmö inö doo miido dootiento quidömetodo ganca inimpa. Ayä betamonca iñömö adobaï doo miido dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö teteta i coatodo mëetodo ganca inimpa. ¹⁸ Mänii wææ cædi aatapeca nani änonca inte mænöni impa. Mänii quëwëñömö guiquënë oodo inte awocawænta bai waëmö inte mænöni impa. ¹⁹ Mänii quëwëñömö wænömënæca mænonte wææ cæqui, ante ñönönincacoo iñömö, Waëmö ëmongäimpa, ante tömënäni quincacoo nani nanguï godonte äninccacoo ænte mämö ñönönincacoo bewodö bewodö cædänitapa.

Tänoca ñönöninca aatapeca nani anca inimpa.
 Waca ñönöninca guiquënë tapidoca nani anca inimpa.
 Waca ñönöninca guiquënë aagataca nani anca inimpa.
 Waca ñönöninca guiquënë etemënaotaca nani anca inimpa.
²⁰ Waca ñönöninca guiquënë oöninteca nani anca inimpa.
 Waca ñönöninca guiquënë codönadïnaca nani anca inimpa.
 Waca ñönöninca guiquënë coditooditoca nani anca inimpa.
 Waca ñönöninca guiquënë bedidoca nani anca inimpa.
 Waca ñönöninca guiquënë topatioca nani anca inimpa.
 Waca ñönöninca guiquënë coditopadacata nani anca inimpa.
 Waca ñönöninca guiquënë aatintoca nani anca inimpa.
 Waca tömanca guiquënë ämatitaca nani anca inimpa.
 Mänimpoca inimpa.
²¹ Mänii wææ cædinemö iñömö önompo tipæmpoga go mënemonga

iñömö pededamö nani ämö önompo tipæmpoga go mëmonga inte mäenonte inimpa. Wææ cædinemö incæ wææ cædinemö incæ pededamö adomonque adomonque inte mäenöninemö inimpa. Mänii quëwëñömö taadö ñænænö godö oodo inte mäenowate taadö awocawænta bai waëmö inimpa.

²²Mönö Wængongui Awënë adocanque Tömää në Cægaingä tönö Wængongui Codotedo tönö mäniiñömö cöwë ongöna ininque godongämæ quëwëñäni guiquënë, Mönö Wængongui oncönë guicæimpa, ante quínante anguinänii. Edæ Wængongui taiyæ waëmö oncö mäniiñömö dæ ä atabopa. ²³Wængongui në ñäö bai ëmönongä inte ñäö apäiquingä bai inongäimpa. Ayæ Wængongui Codotedo iñömö nani ti wodönoincade bai i ininque mänii quëwëñömö iñömö nænque incæ apäicä incæ quínante godömenque ñäö apäiquii. ²⁴Wabæca nani quëwencabo ayæ wabæca nani quëwencabo inänite Wængongui ængä beyænque në quëwëñäni inte mäninänique mänii ñäö apäiyömö cægoncædänimpa. Adobai inguipoga awënë odeyeyidi waëmoncoo nani éadincoo mäniiñömö ænte poncædänimpa.

²⁵Mänii quëwëñömö woyowotæ inämaï ingæimpa. Ininque mäniiñömö wææ cædinemoncoo iimö iñö iimö iñö iñonte cöwë tee mönedamaï ingæimpa. ²⁶Wabæca nani quëwencabo ayæ wabæca nani quëwencabo incæ tömëñäni waëmoncoo nani éadincoo mäniiñömö ænte poncædänimpa. Mänii quëwëñömö waa quëwëñömö impa, ante waa ate apænecædänimpa. ²⁷Quiëmë wænæ wænæ i mäniiñömö cöwë guiidämaï ingæimpa. Në wiwa cædäni incæ në babæ äñäni incæ mänii quëwëñömö guiidämaï inguinänidö angüënë. Wæætë Wængongui Codotedo, Quëwenguintaa, ante nänö yewæmöintaa në yewæmönäni guiquënë tömëñänique guicædänimpa.

22 ¹Ayæ Wængongui anquedo botö imote önö quëwengüimæ

odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ contaimpa inö tapæmpa. ²Mäniiñömö tadinque mänii quëwëñömö taadö ñænænö godö tæcæguedë inö ta gopæmpa. Mäninö æmä wedeca incæ imæ wedeca incæ awæ quëwengüiwæ pæwæ atabopa. Mäniwæ iñömö tömenca wacä apäicä iñonte wacä apäicä iñonte incapa. Ininque adoque wadepo iñedë önompo tipæmpoga go mëa ganca mänimpoga mäniwæ incayedë impa. Wabæca nani quëwencabo ayæ wabæca nani quëwencabo incæ mänimæca quëwëñäni tömëñäni mäniwæ öñabocoo beyæ ganca bacædänimpa, ante ëñabocoo. ³Wængongui pante nänö angainö beyænque quincöomë wænæ wænæ bagatii mäninö mäniiñedë dæ angæimpa. Wængongui tönö Wængongui Codotedo nana aacæ tæ contaimpa mänii quëwëñömö mä ongoncæpaimpa. Tömengä ingante në cædönäni iñömö tömengä ingante watapæ apænedinque tömengä ingante cæcædänimpa. ⁴Tömengä awinca acædänimpa. Ayæ tömengä ëmowo tömëñäni öñönemö inö yewæmonte incædänimpa. ⁵Mäniiñömö woyowotæ inämaï ingæimpa. Edæ mäniiñömö quëwëñäni beyæ Wængongui Awënë në ñäö ëmönongä inte apäiquingä inongampa. Ininque nænque ñäö apäidö incæ ti wodönoincade ëñenö incæ quínante ayæ apäiquii. Ayæ mäniiñömö quëwëñäni adodäni cöwë wantæpiyæ aacædänimpa.

Itota Codito oo poncæcäimpa

⁶Ayæ Wængongui anquedo botö imote apænedinque, “Mäninö bitö ëñenö nö pöni i ininque mäninö ante wede pönengæimpa. Wængongui beyæ në apænëdönäni tömengä Öñowoca ingante ëwocadinque apænëdänipa. Tömëñäni nani në ëwocadongä Wængongui Awënë iñömö tömengä anquedo ingante apænedinque, Bitö botö imote në cædönäni weca godinque, Æbänö oo pöni baquimpa,

ante odömömi acädänimpa, ante da pönongä pongantapa,” ante botö imote apäñecantapa.

⁷Itota Codito, “Aedäni. Botö oo ocä emänte ponguimo imopa. Ii mincayontaa Wængongui beyä apäñedinque nani yewämönte angainö ante nē ēñente cädäni iñömö nani toquinque,” ante apäñecantapa.

⁸Botö Wäömo inömo imopa. Mäninö Wængongui anquedo nänö äñinö ante nē ēñenimo inte botö mänii tömengä nänö odömöninö ante nē adimo inömo imopa. Wængongui anquedo angä ēñeninque ayä odömongä adinque botö nē odömöningä önöwa inö aedä wæante tömengä ingante watapä apäñecate ante cætabopa. ⁹Cæyömote tömengä wæatē, “Mänömaï cädämaï imäwe, angantapa. Botö önonque bitö bai Wængongui ingante nē cæbo imopa. Ayä bitö töninädäni Wængongui beyä nē apäñedönäni tönö ii yewämöintaa nani angainö ante nē ēñente cädäni tönö botö tömënäni bai adobai Wængongui ingante nē cæbo imopa cæbii. Edä Wængonguinque ingante aedä wæäninque, Bitö Wængongui Awënë adobique imidö angüenē, ante apäñee,” angantapa.

¹⁰Wængongui anquedo godömenque botö imote iïmaï angantapa. “Edä mänömaï baquionä oo pöni ingäimpa cæbii. Ii yewämöintaa Wængongui beyä apäñedinque nani angainö ante bitö wē wodönämaï inte do apäñee.

¹¹Nē wënä wënä cädönäni inänite ee abi godömenque wënä wënä cæcädänimpa. Tömënäni nani pönönö wentamö bai nē entawänäni inänite ee abi godömenque nani pönönö wentamö bai entawencädänimpa. Nē nō cädäni inänite ee abi godömenque nō cæte quëwencädänimpa. Nē täiyä wäemö entawänäni inänite ee abi godömenque täiyä wäemö entawencädänimpa.”

¹²Itota Codito, “Aedäni. Botö oo ocä emänte ponguimo imopa. Ocä emänte pöninque botö tömëmö godömo nani ænguincöo, ante næænte ponguimo

imopa. Tömänäni æbänö cädänii, ante adinque botö tömënäni nani cægai ganca ante adoganca godömo æncädänimpa. ¹³Botö Tänobo ingaïmo inte Tömämo inguimo imopa. Tömää badönämaï iñedē botö Do Quëwengäimo imopa. Ayä tömää iinque bayedē incæ botö Ayä Pöni nē Quëwëmö incæboimpa. Wëñēñedē tömää nē Badongäimo inte tömää nē Iinque Cæbo incæboimpa.”

¹⁴Weocoo yamonte bai mimönē nē mënongate inäni iñömö tömënäni nani toquinque edä mänii quëwëñömö wææ cädinemö iñömö go guiquinäni inänipa. Go guidinque tömënäni quëwenguïwä quëwenguinca bequïnäni inänipa. ¹⁵Wiwa cädäni guiquenē mänii quëwëñömö yabæque iñömö ongonte wæquïnäni inänipa. Idöidi nē inäni, nē towente quëwënäni, wacä ingante nē wänönäni yabæque ongönänipa. Wængongui impa, ante nani badöninca gäänē aedä wæäninque nē apäñedäni, nē babæ änäni tönö, Babæ äñemönipa, ante nē änäni tönö tömënäni tömänäni mänii quëwëñömö yabæque iñömö quëwenguïnäni inänipa.

¹⁶“Botö Itotabo ingaïmo imopa. Mäninö botö angainö ante nō impa, ante botö imote godongämä nani pönencabodäni tömänäni inänite apäñecä ēñencädänimpa, ante cädinque botö do botö anquedo ingante minitö weca da pönömo pongantapa. Botö docä Awënë Dabii nänö Wämæncöo ingaïmo inte adobai nänö Pæïmo inömo imopa. Botö wadaamö bai ñäö bayö apäimö bai imopa.”

¹⁷Wængongui Täiyä Wäemö Önöwoca tönö Wængongui Codotedo nänöogängä nani änogä, “Pöedäni,” änapa. Äñöna tömënäni tömëna inate nē ēñänäni inte adobai, “Pöedäni,” ancädänimpa, ämopa. Nē gæwante inäni tömänäni pö becädänimpa, ämopa. Nē beinänäni iñönänite, Minitö quëwenguïmä, ante önonque pönonguïmä incæ pö ænte becämïnimpa, ante ämopa.

¹⁸Ii yewämöintaa Wængongui beyä nē apäñedäni nani angainö ante nē

ēñēnāni tōmānāni inānite, Ee aedāni, botō wææ ämopa. Edæ mäninö nāni angainö ante godömenque wadö änāni inānite Wængongui pancæcäimpa. Ii yewämöintaa quiēmē nāni pante wæwenguincoo, ante yewämonte adinque Wængongui nē wadö änāni inānite mänincoo bai godömenque pancæcäimpa. ¹⁹Ayæ ii yewämöintaa Wængongui beyæ nē apænedāni nāni angainö incæ pancadea ännique nē wëä godonte bai cädāni inānite Wængongui quëwenguiwæ quëwenguinca godönāmai incæcäimpa. Tömengä adobai, Botō tæiyæ waëmö quëwëñömö mäninö

guidāmai incæminimpa, ante ancæcäimpa. Mänii quëwenguiwæ ante mänii quëwëñömö ante ii yewämöintaa yewämonte impa.

²⁰Mäninö ante, Nö impa, ante nē apænecä inömö tömengä inömö, “Ao, botō oo ocæ emænte ponguimo imopa,” angantapa. Äñongante botō,

Mänömai baquinö angüenē, ante, Amëë, ännique, Awënë Itota pöe, ämopa.

²¹Awënë Itota Wængongui nänö guidēnāni inānite waadete godö cæcæcäimpa. Mänömai baquinö angüenē, ante botō, Amëë, ante mäninque ämopa.